

## Diidx Xcuent Jesucrist Nani Bacuaa San Marcw

*Baluu Juan ni rutiobnis*

*(Mt. 3:1-12; Lc. 3:1-9, 15-17; Jn. 1:19-28)*

<sup>1</sup> Scree gusloj diidx xcuent Jesucrist, Xi'n Dios.

<sup>2</sup> Si'cni bacuaa toIsaías, ni gunii xtidx Dios, che räjp Dios:

Bahuii gan, guxhalä ni chanä xtidxä, ganidni chääni lojlu te guzucheeni xnezyujlu.

<sup>3</sup> Riejn xse' ni rbedxa' nez loj reyubijdz:

“Coļyunsä'c xnezyuj Dad, coļslii rexnezyulajzni.”

<sup>4</sup> Biricaj Juan ni rutiobnis nez loj reyubijdzga. Räpgajcni nanabpac gusiechlajzreni, tiobnisgajceni, te jia xtojłreni. <sup>5</sup> Riädcuadiajg xhidajł reni rbäjz Judea, näjza reni rbäjz guedx Jerusalén. Dxejcti cheni ruxhobdojłreni lo Dios, rustiobnis Juanreni neņ gueu Jordán.

<sup>6</sup> Xhajt Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzunbäserguijxh. <sup>7</sup> Caguluiini rebejņ, räpgajcni:

—Detzä siääd tej nani sajcro loä, nani nicla di nungäjl surloä, cuää xcura'chni. <sup>8</sup> Narä abatiobnisä la'tu con nis, biädla laani guxhalni Sprit Dxa xten Dios te cuääzni neņ lastootu. Si'c gustiobnis nani jiääd detzä la'tu.

*Batiobnis Juan Jesús*

*(Mt. 3:13-17; Lc. 3:21-22)*

<sup>9</sup> Dxejc, nen redxejga, birii Jesús guedx Nasare't ni yu' Galilee. Dxejcru batiobnis Juan Jesús nen gueu Jordán. <sup>10</sup> Che birii Jesús nen nis, bahuiini bixal guibaa. siädyäjt Sprit Dxi xten Dios yejcn si'c te palom. <sup>11</sup> Dxejcti guibaali biejn xse' te ni räjp:

—Luj najclu xi'nä ni sanälazä; rbanälazduxhälu.

*Bateed bendxab prueb Jesús*

(Mt. 4:1-11; Lc. 4:1-13)

<sup>12</sup> Sas baxhal Sprit Dxi xten Dios Jesús lo reyubijdz. <sup>13</sup> Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoob Jesús xtiidxni. Dxejcru biääd reangl xten Dios, biädhuiireneni.

*Gusloj Jesús xtzuunni*

(Mt. 4:12-17; Lc. 4:14-15)

<sup>14</sup> Basälreni Juan nen latzguiib. Dxejcti huij Jesús nez Galilee, huiluiini xtidx Dios. <sup>15</sup> Dxejc räjp Jesús:

—Abidzujñ dxej, luxh yälrnibee xten Dios abidzujñ gajxh. Colsiejch lajztu, colchalilajz xtidx Dios.

*Gurejdx Jesús tajp bejn ni rniaaz bäjl*

(Mt. 4:18-22; Lc. 5:1-11)

<sup>16</sup> Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäjl.

<sup>17</sup> Dxejc räjp Jesús lojreni:

—Coltanajl narä, te gunä cueedxtu bejn lacuaa ni guiniaaztu bäjl.

18 Lagajc dxejc basa'nreni rexquijxhreni, sanätirenini.

19 Dxejc gusaj Jesús sche'n, sas bahuiini loj Jacoob näj Juan, rexi'n Zebedeo. Cayunsa'creni xquijxhreni neñ xcanuureni. 20 Guredxgajcni guiro'preni, dxejcti laareni basa'nreni xtadreni Zebedeo neñ canuu, näjza rexmosni, sanätireni Jesús.

*Te bejn nani guyu' beñdxab neñ lastooni  
(Lc. 4:31-37)*

21 Bidzujntireni guedx Capernaum. Dxejcru sabd, dxej ni rusilajz rexpeñ Israel, biu' Jesús neñ guidobäz xten rexpeñ Israel. Dxejcti baluii Jesús rebejn ni tre' ro'c. 22 Bidxelojni rebejn xtiidxni, sa'csi caguluiinireni si'cpac te ni rnibee, xhet si'cdi remastr xten leiidi. 23 Neñ xquidobäzreni yu' te bejn yu' te beñdxab neñ lastooni. Beñdxabga guredxa', räjpni:

24 —Jesús, ni siääd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu beñdxan ni siääd lo Dios.

25 Dxejcti gudidxa' Jesús lo beñdxabga, räjpni lojni:

—Basäuu ro'lu, birii neñ lastoo niguiire.

26 Sas beñdxabga batienguij niguiiga, luxh cabedxa'ni biriini neñ lastoo niguiiga. 27 Bidxejbtigiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj rebeñdxab, luxh ruzoobreni xtiidxni.

28 Di niacjaa gucbee rebejn guideb nez Galilee xhi rujn Jesús.

*Basiajc Jesús xnan suegr Pedr**(Mt. 8:14-15; Lc. 4:38-39)*

<sup>29</sup> Che biriireni xquiidobäz rexpejn Israel, huinä Jesús Jacobob näj Juan rolijz Simón näjza Andrés.

<sup>30</sup> Luxh xnan suegr Simón naga', yu'ni xliaa. Dxejc räjpreni lo Jesús:

—Cayacxhuuni.

<sup>31</sup> Dxejcti gubig Jesús lojni, gunaaazni ñaani, guläsnini; lagajc dxejc biriini xliaa. Dxejc gusloj cayunireni.

*Xhidajl beñracxhuu basiajc Jesús che huääz gubijdx**(Mt. 8:16-17; Lc. 4:40-41)*

<sup>32</sup> Che huääz gubijdx, luxh abiu' guxhijn, biädnäreni guiraa rebeñracxhuu loj Jesús, näjza renani yu' beñdxab nen lastooni. <sup>33</sup> Luxh guideb guejdxga bidojp ro' yu'ga.

<sup>34</sup> Basiajc Jesús xhidajl renani rajc garen-garen yälguijdx. Niluxh gulääzani xhidajl beñdxab, niluxh dini nusaan ninii rebeñdxabga, sa'csi najnreni chu najcni.

*Baluu Jesús nez Galilee**(Lc. 4:42-44)*

<sup>35</sup> Che bara yääl, cäyru bistie Jesús, biriini sääni te laad cadro ruti bejn. Ro'c cabejdx-canabni loj Dios. <sup>36</sup> Dxejcti Simón näj resa'ni huitiilreni Jesús.

<sup>37</sup> Che bidxälrenini, räjpreni lojni:

—Guiraa rebejn caguillu.

<sup>38</sup> Dxejc räjp Jesús lojreni:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

<sup>39</sup> Dxejcru cuansaj Jesús guideb nez Galilee, caguluiini xtidx Dios nen reguidobäz xten rexpejn

Israel. Gunibeezani birii reben<sub>dx</sub>ab ne<sub>n</sub> lastoo xhidajl rebejn.

*Basiajc Jesús te bejn ni ral tiejxhni*

*(Mt. 8:1-4; Lc. 5:12-16)*

<sup>40</sup> Gubig te be<sub>n</sub>racxhuu ni ral tiejxhni loj Jesús, bazuxhijbni. Dxejcti räjpni lojni:

—Narä nanä sajc gusiajclu narä palga rlaizlu.

<sup>41</sup> Balaslajz Jesús be<sub>n</sub>racxhuuga, gunaazni naani, räpgajcni:

—Rlazä jiajclu. Biajc naj.

<sup>42</sup> Cheni guniini scree, biacgajc be<sub>n</sub>racxhuuga.

<sup>43</sup> Dxejcti gulunejz Jesús bejn<sub>ga</sub>. Per räpxgaani lojni:

<sup>44</sup> —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani räjp toMoisés gudeed bejn lo Dios si'c te seen, te gacbee rebejn abiajclu.

<sup>45</sup> Dxejc säa bejn<sub>ga</sub>. Sas gusloj cayujyni diidx lo rebejn xcuent guiraa nani guj<sub>cni</sub>. Ni'cni diru niajcdi niu' Jesús nicla tej guejdx. Cansajni te laad cadro ruti bejn. Niluxh guiranejz rii rebejn, siädhuiireni Jesús.

## 2

*Basiajc Jesús te bejn ni di guniib*

*(Mt. 9:1-8; Lc. 5:17-26)*

<sup>1</sup> Che agudejd balti dxej, biusac Jesús ne<sub>n</sub> guedx Capernaum. Dxejcti biejn diajg rebejn arbäjn<sub>ni</sub>.

<sup>2</sup> Bidopgajc xhidalduxh bejn. Gudxaj ne<sub>n</sub> yu'. Nicla rolä' di niajl nisiujreni. Dxejcti caguluii Jesús xtidx Dios lo rebejn. <sup>3</sup> Dxejcti bidzuj<sub>n</sub> tajp bejn, nuureni te bejn ni digacti guiniib; siädnärenini lo

Jesús. <sup>4</sup> Luxh di niajcdi nidzujnreni cadro suga' Jesús, sa'csi yu' xhidajl bejn ro'c. Ni'c baxhalreni yejc yu' nejc cadro sujni. Dxejcru cadro baxhalreni basiäjtreni da' ni naga' beñracxhuuga lojni. <sup>5</sup> Che bahuii Jesús rililajzreni, dxejc räjpni loj beñracxhuuga:

—Xi'nä, agubicaj rextojllu.

<sup>6</sup> Sas gaii bejn ni ruluu leii ni sobga' ro'c bejnreni xhigab neñ lastooreni, naareni: <sup>7</sup> “¿Xhicuent rni niguiire scree? Caniyajni Dios; rut rajcdi rudzucaj dojl. ¡Diostis rajc rudzucaj dojl!” <sup>8</sup> Dxejcti gucbegajc Jesús xhi xhigab cayujnreni. Dxejc räjpni lojreni:

—¿Xhicuent rujntu xhigab si'c neñ lastootu?

<sup>9</sup> ¿La guyasiru gäbni loj beñracxhuure: “Agubicaj rextojllu”, o la gäbni: “Huistie, cua' xta'lu, gusaj”? <sup>10</sup> Baj naj, te gantu rajc rudzucaj Xi'n Dios, nani gujc Niguii, dojl lo guedxliujre, cania loj beñracxhuure:

<sup>11</sup> —Lojlu rniä, ¡Huistie, cua' xta'lu, huij rolizlu!

<sup>12</sup> Lagajc dxejc huistie beñracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

### *Gurejdx Jesús Leví*

*(Mt. 9:9-13; Lc. 5:27-32)*

<sup>13</sup> Dxejcru gubisac Jesús ro' nis xten Galilee, luxh che bidojp guiraa rebejn lojni, baluiini xtidx Dios lojreni. <sup>14</sup> Sasaj Jesús che bidxaagni Leví, xi'n Alfeo. Sobga'ni cadro rusquijxni rebejn. Dxejc räjp Jesús lojni:

—Gudanajl narä.

Sas huisuni, sanajltini Jesús.

<sup>15</sup> Dxejc sobga' Jesús cayajwni rolijz Leví. Luxh sobganäj Jesús xhidajl reni rusquijx, näjza rebeñdojl ni di chasanäj leii, näjza rexpejn<sub>pacni</sub>, lo mex. Xhidajlreni tre', luxh sanajlreni Jesús.

<sup>16</sup> Dxejcru rebejn ni ruluii leii näj refarisee, che bahuiireni cayaunäjni renani rusquijx näjza rebeñdojl, räjpreni loj rexpejn<sub>pac</sub> Jesús:

—¿Xhicuent rbenäj xmastrtu reni rusquijx näj rebeñdojl, luxh raunäjnireni, ränäjnireni?

<sup>17</sup> Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquiin doctoor. Dina niädtedxä rebeñsa'c, biädtedxä rebeñdojl, te gusiech lajzreni.

*Gunabdiidxreni loj Jesús xcuent yäl<sub>rucua</sub>'n*

*(Mt. 9:14-17; Lc. 5:33-39)*

<sup>18</sup> Cagucua'n rexpejn Juan näj rexpejn refarisee, renani najc rebeñguidoo loj guedx Israel. Dxejc biädäd gaii bejn loj Jesús, gunabdiidxreni lojni räjpreni:

—¿Xhicuent cagucua'n rexpejn Juan näj rexpejn refarisee luxh rexpejn<sub>paclu</sub> di gucua'n?

<sup>19</sup> Dxejcti räjp Jesús lojreni:

—¿La rucua'n rebejn ni rdon chää cadre ru' yäl<sub>ruchnaa</sub> che meer suga' bi'n? Che meer suga' bi'n lojreni, direni gucua'n. <sup>20</sup> Per sidzujn dxej sibicaj bi'n lojreni, dxejc sii sucua'nreni.

<sup>21</sup> Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhi-roobruni räjs. <sup>22</sup> Rutza rusäl<sub>di</sub> bin ni gajd guilaj

neṅ guidyux ni abigaa. Sa'csi bin ni gajd guilajga sutiäjsni guijdga che guilajni, luxh sinijt binga näjza guijdga. Ni'cni nanab gusälni bincoob neṅ guidcoobza.

*Batojp rebejn ni rinajl Jesús triuu sabd*

*(Mt. 12:1-8; Lc. 6:1-5)*

<sup>23</sup> Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu. <sup>24</sup> Dxejc räjp refarisee, renani najc bēnguidoo loj guedx Israel, loj Jesús:

—Arniä, ¿xhicuent rujn rexpejn paclu dzuun ni di guchaag gunni neṅ dxej ni rusilajznu, ä?

<sup>25</sup> Dxejcti räjp Jesús lojreni:

—¿La gajdte gol nani bejn toDavid te huält, laani näj resa'ni, ä? Che biäädx xhi gauureni, gulaanreni. <sup>26</sup> Biu' David neṅ xyu' Dios cheni guyu' toAbiatar loj Dios. Abiatar sajcro loj rebixhojz ni guyu' neṅ xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

<sup>27</sup> Räjpza Jesús lojreni:

—Dios bejn dxe sabd sa'csi najnni naquiinpac gusilajz bejn. Dini niujn sabd te gapda bejn.

<sup>28</sup> Ni'cni narä, Xi'n Dios ni gujc Niguii, näjza sabd rnibeä.

### 3

*Niguii ni nabidz te naani*

*(Mt. 12:9-14; Lc. 6:6-11)*

<sup>1</sup> Biu' Jesús stehuält neṅ xquidobäz rexpejn Israel. Ro'c yu' te niguii nani nabidz te naani.



<sup>2</sup> Niluxh ro'c cagula'tz rebejn̄ Jesús don la susiajcn̄i niguiiga sabd, dxej ni rusilajz rexpejn̄ Israel, sa'csi rlaizreni cue'creni xquejni loj nani rnibee rexpen̄ Israel. <sup>3</sup> Dxejc räjp̄ Jesús lo niguii nani nabijdz̄ ñaani:

—Huistie, guzuj galäiire.

<sup>4</sup> Dxejcti gunabdidxgajcn̄i loj gaii rebejn̄ga, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yäl̄nabajn̄, o la sugu'tni?

Luxh laareni biacdxireni. <sup>5</sup> Dxejc nadxe'ch bahuii Jesús lojreni, luxh guc-huin laizni, sa'csi guc najd laizreni. Dxejc räjp̄ Jesús loj niguiiga:

—Baslii ñaalu.

Dxejcti basliini ñaani. Biajctini. <sup>6</sup> Dxejcru bi-unejz refarisee. Guslogajcreni caguchaagreni didx con reni nadxaag Herodes, te don xho ju'treni Jesús.

### *Xhidajl bejn̄ bire' ro' nis*

<sup>7</sup> Jesús näjza rexpejn̄pacni sääreni ro' nis, luxh xhidajl ben̄ Galilee birinajlni. <sup>8</sup> Che gojnreni redzunro ni rujn̄ Jesús, xhidajlreni biäd. Yu'reni birii Judea, yu'reni birii guedx Jerusalén, yu'reni birii Idumea, yu'zaren̄i birii nejz stelaad gueu Jordán, biriizaren̄i nez guedx Tiro, näj nez guedx Sidón, biädhuiireni loj Jesús. <sup>9</sup> Ni'cni räjp̄ Jesús loj rexpejn̄pacni quiilreni te canuu, te na'c gutää reben̄xhidaalgani. <sup>10</sup> Abasiajc Jesús xhidajl ben̄racxhuu, ni'cni guiraasi ben̄racxhuu caxa't lojni, te can̄reni te jiajcreni. <sup>11</sup> Niluxh che rhuii reben̄dxab lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

<sup>12</sup> Dxejcti Jesús gudidxa' lojreni te na'c niäjbreñi chu najcni.

*Gule Jesús tzubitiop bejn loj reni rinajlni*

*(Mt. 10:1-4; Lc. 6:12-16)*

<sup>13</sup> Birii Jesús sääni lo te dajne' cadro gurejdxni renani rlajzni cueni. Gubigtireni lojni. <sup>14</sup> Dxejcti guleni tzubitio'preni te sanäjreni laani, te guxhalnireni chaluiireni xtidx Dios; <sup>15</sup> te ga'preni yälrnibee te gusiajcreni beñracxhuu, te cuääzareni rebeñdxab. <sup>16</sup> Retzubitio'p bejn ni gule Jesús najc: Simón, ni gulälajzani Pedr. <sup>17</sup> Dxejcti Jacob con Juan, rexi'n Zebedeo, gulälaj Jesús Boanerges. Con xtiidxnu sälojni bejn ni nasesya', si'c guzii. <sup>18</sup> Näj Andrés, Felipe, Bartolomé, Mateo, Tomás, Jacob xi'n Alfeo, Tadeo, Simón, ni di guidxejb rnigajc, <sup>19</sup> näj Judas Iscariot, ni bato' Jesús loj reni rdxech-lajz lojni. Sä'tireni rolijz te dade'.

*Yälrnijaj loj Sprit Dxañ xte Dios*

*(Mt. 12:22-32; Lc. 11:14-23; 12:10)*

<sup>20</sup> Dxejc bidopsac rebeñxhidaalga; nicla niajc niaunäj Jesús rexpejn pacni. <sup>21</sup> Che biejn diajg resa' Jesús dee, biädxhiirenini, sa'csi naareni, yejcnì cayajc.

<sup>22</sup> Rebejn ni ruluii leii ni birii guedx Jerusalén bidzujnza lo Jesús, dxejc räjpreni:

—Beelzebú, nani rnibee rebeñdxab, yu' nen lastoo niguiire. Niluxh nani rnibee rebeñdxab rudeed yälrnibee lo Jesús te cuääni beñdxab.

<sup>23</sup> Dxejc gurejdx Jesús rebejn ga, bijyni te cuent ni ruluii lojreni, räjpni:

—¿Xho gurilaagw bendxab lagajc sabendxabni?  
 24 Palga rebejn xten te yälrnibee la'reni, luxh tilnä  
 te cuaani ste cuaaga, di yälrnibeega chu xchej.  
 25 Palga te famil rdilnä lagajc sa'ni, di familga  
 chu xchej. 26 Palga bendxab nani rnibee tilnä  
 lagajc laani, di xcälrnibeeni chu xchej, sa'csi ni'c  
 gun luuxni.

27'Rut gacdi jiu' rolijz te niguidaän, cuanni xhix-  
 htenni, palga dini gulibxgaani, si'ctis sajc cuanni  
 xhixhtenni.

28'Rniliäpac lojtu guiraa dojl näjza yälrnijaj xten  
 rebejn sajc jia. 29 Nani guinijaj Sprit Dxaan xten  
 Dios, digacdi guibicaj rextojlni, anuutisni xtojlni  
 par tejpas.

30 Räjpni si'c sa'csi caniireni yu' bendxab neñ  
 lastooni.

*Xnan con rebetzhuin Jesús  
 (Mt. 12:46-50; Lc. 8:19-21)*

31 Dxejcru bidzujn xnan Jesús, näj rebetzhuinni.  
 Direni niu', baxhaltisreni chu huitejdxni. 32 Rebejn  
 ni sobga' gabi Jesús räjpreni lojni:

—Xnanlu näj rebejtzlu suga' ro lä', caguuilreni  
 luj.

33 Dxejcti räjp Jesús lojreni:

—¿Chu reni'c najc xnanä näj rebetzä?

34 Bahuigajcni loj renani sobga' gabini, dxejc  
 räjpni lojreni:

—Redee najc xnanä, rebetzä. 35 Chutis ni rujn ni  
 rlanj Dios, ni'c najc betzä, bisianä, näjza xnanä.

## 4

*Xcuent niguii ni sale'c binij*  
*(Mt. 13:1-23; Lc. 8:4-15)*

<sup>1</sup> Suga' Jesús ro' nis guslosac caguluiini xtidx Dios, luxh bidojp xhidajl bejn cadre suga'ni. Xhidalduxh najcreni, ni'cni biu' Jesús neñ te canuu ni suga' ro' nisga. Dxejcti gurejni neñga, biääd guiraa bejn bia'ntireni ro' nis. <sup>2</sup> Dxejc balui- inireni guiraloj, ganax cuent ni ruluu guniini. Che caguluiini, räjpni lojreni:

<sup>3</sup> —Gucuadaiajgtu dee. Guyu' te niguii. Biriini sale'cni binij. <sup>4</sup> Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. <sup>5</sup> Stee lajt biajb binijga neñ guij cadre xheti xhidajl yuj. Binijga gulengajcni, sa'csi xheti xhidajl yuj ro'c. <sup>6</sup> Dxejc, sa'csi lo jiaa yu' xlobaani, che birii gubijdx, bigolni, gubijdz- tini. <sup>7</sup> Stee lajt biajb binijga neñ yaguejch. Dxe- jcti biroob reyaguejchga, luxh bejnreni balaa loj binijga, ni'cni gujcni ganax bilii. <sup>8</sup> Per stee lajtga biajb binij lo yusa'c. Gulejn reyäjlg, guroobreni, gucsa'creni. Yu'reni cuaj galbitzuu xob, yu'reni cuaj gayojñ xob, yu'zarení cuaj tegayuu xob.

<sup>9</sup> Dxejc räjpni lojreni:

—Chutis ni rlanj guisieed, sucuadaiajni.

<sup>10</sup> Che asii xhidajl bejn, rebejn nani suga' gajxh cadre suganäj Jesús guitzubitio'p xpejn pacni gun- abdiidx lo Jesús xhi säloj cuentre. <sup>11</sup> Dxejc räjp Jesús:

—Dios abejn gacbeetu te gantu xho najc yälxhiga'tz xten xcälrnibee Dios nani najc xhiga'tz ñajli. Niluxh lo ste'ca bejn con cuenttis rniä guiraa

recosre, <sup>12</sup> te mase cahuiireni direni gumbee, te mase cayiejn diajgreni, direni gacbee. Scree gacni, te na'c gusiejch lajzreni, te na'c guibicaj xtojreni.

<sup>13</sup> Räjpzani lojreni:

—¿La ditu gacbee cuentre? ¿Xhocha gacbeetu xhidajlru cuent? <sup>14</sup> Niguiire nani sale'c binij najc si'c te nani ruluu xtidx Dios. <sup>15</sup> Yu' bejn ni najc si'c binij ni biajb cuä' nezyuj: riejn diajgreni xtidx Dios nani ruluu bejn. Dxejc che jiejn diajgreni xtidx Dios, riääd Satanás rbägajcni xtidx Dios ni yu' nejn lastooreni. <sup>16</sup> Yu'za rebejn ni najc si'c binij ni biajb nejn reguij, renani che jiejn diajgreni xtidx Dios, rbaa lajzreni rca'reni diidxga. <sup>17</sup> Niluxh direni nisiudzu'tz, sa'csi guxii huilli lajzreni. Che rdejdreni trabajw o che rusacsí bejnreni xcuent xtidx Dios, rusaanreni xtidx Dios. <sup>18</sup> Yu'zarení najc si'c binij ni biajb nejn yaguejch, riejn diajgreni xtidx Dios, <sup>19</sup> dxejc che ru'rurení yärsia' xcuent recos guedxliujre, rsia' lajzreni ga'preni meel, rla-jzreni ga'prurení guiraloj recos, dxejc riu' redee nejn lastooreni, rusäuuni lo xtidx Dios, xlia'si biejn diajgreni xtidx Dios. <sup>20</sup> Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzoo xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

*Xhet yuchetzu'tzdi ni di guidzujn dxej sisäbdiidx  
(Lc. 8:16-18)*

<sup>21</sup> Räjpza Jesús lojreni:

—¿La riädnätu te bajl te suuni dejtz te alm, o nen te loon, ä? ¿La xhet nanabdi suuni jiaa te guzanijni, ä? <sup>22</sup> Xhet yuchetzu'tzdi ni di guidzujñ dxej sisäbdiidx. Xhetiza xhicos naga'tztis. Naga'tzni ñaj, niluxh sidzujñ dxej sule'ni. <sup>23</sup> Pal yu' chu rlajz guisieed, sucuadiajgni.

<sup>24</sup> Räjpa Jesús lojreni:

—Colyunxгаа xhigab rediidx ni riejn diajgtu. Nani rusäلتu loj xhigabtu, ni'cza guniidx Dios xca'tu, luxh sisiojbru yejc ni xca'tu. <sup>25</sup> Renani rajp che'n yälñajñ, lojreni sudeedru Dios yälñajñ. Luxh renani xhetru rusälđi loj xhigabreni, sudzucaj Dios yälñajñ nani rajpreni.

### *Xcuent binij ni roob*

<sup>26</sup> Guniiza Jesús lojreni:

—Yälñibee xten Dios najc si'c rsiajc te niguii che rbe'cni binij lo yuj, <sup>27</sup> dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. <sup>28</sup> Acanajñ yujga rajc binij lojni. Galoo rii cuane'ga, sas rii doj lojni. Dxejcru rdxaj bejdze' neñ dojga. <sup>29</sup> Dxejcti che aguyajl bedze'ga, ruxhałni chu ritiuugni, sa'csi abidzujñ dxej ni guidojpni.

### *Xcuent bedz muxhtas* (Mt. 13:31-32; Lc. 13:18-19)

<sup>30</sup> Räjpa Jesús:

—¿Xhini'c najc si'c najc xcälñibee Dios? ¿Xhi te cuent guiniinu te guiluiinuni? <sup>31</sup> Si'c te bedz muxhtas ni rbej loyuj, si'c najcni. Bedz muxhtas najcni bedz bäze'ru loj guiralii bedze' ni yu' loj guedxliuj. <sup>32</sup> Dxejc che agurejni, roobni, rajcni

yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpalaani.

*Si'c baluii Jesús ganax con cuent*  
(Mt. 13:34-35)

<sup>33</sup> Si'c ruluii Jesús rebejn̄ xtidx Dios guniini xhidal cuent sa' redee, si'ctis ni rajc racbeereni.  
<sup>34</sup> Con recuent ni ruluiitis gunii Jesús lojreni. Niluxh lo rexpejn̄pacni basule'ni guiraa recuentre.

*Rusiacdxi Jesús bej näj nisdo*  
(Mt. 8:23-27; Lc. 8:22-25)

<sup>35</sup> Lagajc gudxejga räjpni loj rexpejn̄pacni:  
—Colcho', chonnu stelaad nis xten Galilee.

<sup>36</sup> Basa'ntireni rebejn̄, sanätireni Jesús neñ canuu cadre sobgajcni. Dxejcti sgaii canuu sanajlni. <sup>37</sup> Chela gubi' te beduxh, gusloj cayu' nis neñ canuuga. Cadxaj canuuga nis. <sup>38</sup> Nagayejs Jesús dejtz canuuga, nagayejsni. Bacuäänreni Jesús, räpgajcreni lojni:

—Dad mastr, ¿la dilu jiu siääznu neñ nis, ä?

<sup>39</sup> Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgajc bej, biacdxini. <sup>40</sup> Räjp Jesús loj rexpejn̄pacni:

—¿Xhicuent cadxebduxhtu? ¿La ditu chalilajz xtidxä, ä?

<sup>41</sup> Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoo-breni xtiidxni?

## 5

*Nigui Gadara ni yu' bendxab neṅ lastooni*  
(Mt. 8:28-34; Lc. 8:26-39)

<sup>1</sup> Bidzujntireni stelaad ro' nisga, lo yuj xten Gadara. <sup>2</sup> Si'ctis ni birii Jesús neṅ canuu, biädgajc te niguii lojni ni birii neṅ rebiliää cadro rga'tz beṅgut. Yu' bendxab neṅ lastoo niguiiga. <sup>3</sup> Rbäjzni neṅ rebiliääga luxh rut rajcdi rucuaduuni, nicla con cadeṅguiib. <sup>4</sup> Xhidajl huält agacbacuaduureni ni', ṅaa niguiiga con cadeṅguiib, luxh litis batiuugni recadeṅguiibga, rut rajcdi rusiacdxini. <sup>5</sup> Si'ctis canzajni, dxej, yääl. Rbedxa'ni neṅ redajn, neṅ rebiliää, luxh cagutiugni tiejxhni con reguij. <sup>6</sup> Che bahuiini loj Jesús zijtru, baxuṅni huichaglojni Jesús, bazuxhijbni lojni. <sup>7</sup> Dxejcti rbedxaduxhni, räjpni:

—¿Xhicuent siäädllu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsílu narä.

<sup>8</sup> Sa'csi agac cayäjb Jesús lojni:

—Luj, bendxab, birii neṅ lastoo niguiiga.

<sup>9</sup> Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidalro, sa'csi xhidajl najcnu.

<sup>10</sup> Sanuutis canabni lo Jesús na'c guxhalni re-bendxabga ste'ca guejdx. <sup>11</sup> Ro'c tre' xhidalduxh cuch cuä' dane'ga, cayajwreni. <sup>12</sup> Dxejc gunab re-bendxabga loj Jesús, räjpreni:

—Baxhal nuure loj recuchre te jiu'nu neṅ lastooreni.



13 Dxejcti basaan Jesúsreni. Biriiti reben<sub>dx</sub>abga ne<sub>n</sub> niguiiga, dxejc biu'reni ne<sub>n</sub> lastoo recuchga. Yu' si'cti tiop mi<sub>l</sub> cuch ro'c. Baxu<sub>n</sub> recuchga, dxejc birolreni ro' guilaj, bitejbreni ne<sub>n</sub> nis, gujttireni ne<sub>n</sub> nisga.

14 Renani cayajp recuchga baxu<sub>n</sub>reni, huiyei-ireni diid<sub>x</sub>ga ne<sub>n</sub> guej<sub>dx</sub>, näjza loniaa. Dxejc biääd bej<sub>n</sub> biädhu<sub>ii</sub> nani guj<sub>c</sub> ro'c. 15 Che bidzuj<sub>n</sub>reni cadre suga' Jesús, bahuiireni loj niguii nani guyu' reben<sub>dx</sub>abga ne<sub>n</sub> lastooni. Sobga'ni ro'c, najcwni xhajbni luxh nasa'c yej<sub>cni</sub>. Niguiire najc nani guyu' ben<sub>dx</sub>ab ni laa Legión ne<sub>n</sub> lastooni. Bidxejbti rebej<sub>n</sub> nani bahuii lojni. 16 Dxejcru rebej<sub>n</sub> ni bahuii xhi guj<sub>c</sub> ro', huiyeiireni diid<sub>x</sub> xho guzajc niguiire nani guyu' ben<sub>dx</sub>ab ne<sub>n</sub>ni galoo, näjza nani guzajc recuch. 17 Dxejc gusloj canabreni loj Jesús jiunejzni.

18 Che biu' Jesús ne<sub>n</sub> canuu, niguii nani guyu' ben<sub>dx</sub>ab ne<sub>n</sub> lastooni gunabni loj Jesús, räjpni:

—Huinä narä.

19 Per di Jesús nusaan nijni. Räjp Jesús lojni:

—Huij rolijzlu, lo resa'lu. Huiyeii diid<sub>x</sub> lojreni xho bennäj Dadlu, näjza xho balaslajzni luj.

20 Sä'ti niguiiga, gusloj cayujy<sub>ni</sub> diid<sub>x</sub> ne<sub>n</sub> reguej<sub>dx</sub> xten Decápolis xho bennäj Jesúsni. Guiraa rebej<sub>n</sub> bidxeloj.

*Xindxa'p Jairo näjza gunaa ni bahual<sub>l</sub> xhajb Jesús (Mt. 9:18-26; Lc. 8:40-56)*

21 Che bidzu<sub>nsac</sub> Jesús stelaad ro' nisga ne<sub>n</sub> canuu, bidzuj<sub>n</sub> xhidalduxh bej<sub>n</sub> cadre suga'ni. Bia'nti Jesús ro' nisga. 22 Dxejcru biääd te niguii nani laa Jairo, ni rnibee ne<sub>n</sub> xquidobäz rexp<sub>e<sub>n</sub></sub>

Israel. Che bahuini loj Jesús, bazuxhijbni lojni.

<sup>23</sup> Canabpacni lojni, räjpni:

—Xindxapä'ä acayejt. Gudaa, guzujlu ñaalu yejcní, te jiajcní, te guibajñni.

<sup>24</sup> Sanäti Jesús bejnga. Xhidajl bejn sanajlni, luxh cagutäärenini. <sup>25</sup> Loj rebenxhidaalga yu' te gunaa ni agujc tzubitio'p ijz racxhuuni yälguidxbäii.

<sup>26</sup> Agudedduxhni trabajw, abahuii xhidajl doctoorni. Xlia'si abanijtni guiraa nani räjpni, luxh xhet racnäjdini, alga rxuuruni. <sup>27</sup> Sa'csi biejn diajgni xhini'c canii rebejn xcuent Jesús, gubig gunaaga nez dejtz Jesús, guideb neñ rebejn, bahualni xhajn Jesús.

<sup>28</sup> Cayujñni xhigab, naani: “Palga narä falä xhajbtisni, siacä.” <sup>29</sup> Lagajc dxejc guläjz caxe' xtiejñni, gucbeeza tiejxhni abirii xcälracxhuuni. <sup>30</sup> Gucbegajc Jesús yu' chu abasiajcní. Gubiregajcní neñ rebenxhidaalga, räjpni:

—¿Chuni'c bahual xhabä?

<sup>31</sup> Dxejcru räjp rexpejñpacni lojni:

—Rhuiilu benxhidaal cagutäálu, luxh naalu: “¿Chuni'c bahual xhabä?”

<sup>32</sup> Sas cahuii Jesús nez ree, nez rec, te fini loj nani bahualni. <sup>33</sup> Dxejc bidxejb gunaare, racsejsni, sa'csi gucbeeni xhini'c gujcní. Dxejc biädni, bazuxhijbni loj Jesús, räbliini loj Jesús guira'ti ni bejñni. <sup>34</sup> Dxejc räjp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolijzlu, abiajc xcälracxhuulu.

<sup>35</sup> Canisijc Jesús si'c che bidzujñ renani birii rolijz dade' ni rnibee neñ xquidobáz rexpejñ Israel. Räjpreni:

—Agujt xindxape'lu. ¿Xhicuent rusieedrulu Dad mastr?

<sup>36</sup> Dxejc che biejn diajg Jesús nani caniireni, räjpnı lo dade'ga:

—Na'c guidxejblu. Bililajztis.

<sup>37</sup> Luxh dini nusaanru nij chu ninäni, Pedrtis näj Jacoob näjza Juan bejtzni. <sup>38</sup> Che bidzujñni rolıjz dade'ga, bahuii Jesús biejy ni cayujn rebejn ni rbedxa' roon. <sup>39</sup> Biu'tini räjpnı:

—¿Xhicuent rujntu si'c? Gajd dxape're guet. Na-gayejssini.

<sup>40</sup> Alga baxhiznäjrenini. Dxejc gunıbee Jesús birii guiraa rebejnıga. Dxejcti huınäni xcuzajn dxape'ga con renani sanäni. Biu'reni cadro naga' dxape're.

<sup>41</sup> Gunaazni ñaa dxape'ga, dxejc räjpnı:

—Talita cumi —nani säloj con xtiidxnu: Dxape', lojlu rniä, huıstie.

<sup>42</sup> Dxejcti huıstie gajc dxape'. Tzubıtio'p ijz yu' dxape'ga. Bidxeloduxh rebejn ni bahuii guläs Jesús dxape'ga. <sup>43</sup> Dxejc balıjdx Jesús reni te rut lojdi chaye'tzreni xhini'c gujc. Gunıbegajcni gudeedreni xhi gauu dxape'ga.

## 6

### *Che guyu' Jesús Nazare't*

*(Mt. 13:53-58; Lc. 4:16-30)*

<sup>1</sup> Dxejcru birii Jesús ro'c, huijni lajdxni, sanäzani rexpejnıpacni. <sup>2</sup> Che bidzujñ sabd, dxej nani rusilajz rexpejnı Israel, gusloj caguluıini neñ xquıdobäz rexpejnı Israel. Bidxeloj xhidajl bejn nani biejn diajg rextiidxni, räjprenı:

—¿Caro bisieed niguiire guiraa recosre? ¿Xhi yälınajre cua'ni ni'c rajc rujñni rextzunduxh Dios

con naani? <sup>3</sup> ¿La xhet laadi carpinteer, xi'n Marii, bejtz Jacobob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. <sup>4</sup> Dxejç räjp Jesús lojreni:

—Catis rinälajzreni te ni rnii xtidx Dios. La-jdxtisni, lagajç loj resa'ni, rolijztisni, ro'c rut rinälajzdini.

<sup>5</sup> Luxh di niajçdi niujn Jesús xhidajl milaagwr ro'c. Tiopchontis benracxhuu basiajçni, bazujni naani yejçreni. <sup>6</sup> Bidxelo Jesús sa'csi di lajzreni nilii. Caguluiitini neñ guiraa reguejdxe' ni ria'n gajxh nejzga.

*Baxhal Jesús tzubitio'p bejn ni rinajlni chaluireni xtidx Dios*

*(Mt. 10:5-15; Lc. 9:1-6)*

<sup>7</sup> Dxejçru gurejdxni guitzubitio'p xpejnpacni. Gusloj caguxhalni tiopgajreni; badeedzani yälrnibee lojreni te guinibeereni loj rebendxab.

<sup>8</sup> Gunibeeni xhet chanädireni lo nejz, ganaxhtis te yajg te sanäjreni. Di nungäjł chanäreni nicla bisiuud, nicla yätxtiil, niclaza meel neñ dobdäjł.

<sup>9</sup> Nungäjłza xcaj gura'ch ni'reni, nägajç ga'preni tejtis gamangw, xhet tio'pdini. <sup>10</sup> Dxejçti räjpni lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga. <sup>11</sup> Palga yu' te guejdx cadre direni gusaan jiu'tu luxh di rlajzreni cuadiajçreni diidx ni sanätu, colrii guejdxga, colcuijb guxhuj ni'tu si'c te seen te gacbeereni xhet laadi bejnreni. Rniliäpac lojtu,

guxiiru trabajw ted reben̄ Sodoma näj reben̄ Gomorra quela rebejn̄ ni yu' guejdx cadro direni gusaan jiu'tu.

<sup>12</sup> Dxejc biriireni, sääreni. Cayäbgajczeni nanabpac gusiejch lajz rebejn̄. <sup>13</sup> Gulääzarenixhidajl beṅdxab dxejcti gudääbreni se't yejc xhidajl beṅracxhuu, luxh biajcreni.

*Xcälgujt Juan ni rutiobnis*

*(Mt. 14:1-12; Lc. 9:7-9)*

<sup>14</sup> Herodes najc nani rnibee dxejc. Biejn diajgni xpala'n Jesús, sa'csi guiralii rebejn̄ calä'p xpala'nni. Dxejc räjp Herodes:

—Juan nani rutiobnis ahuäjs loj rebengut, ni'c rajc rujnni remilagwre.

<sup>15</sup> Sgaii bejn̄ räjp:

—Laa Elías ni gunii xtidx Diosni.

Sgaiireni räjp:

—Laa te bejn̄ ni rnii xtidx Dios, o sa' te rebejn̄ ni gunii xtidx Dios agujc xchero.

<sup>16</sup> Che biejn diajg Herodes si'c, räjpni:

—Laa Juan dee, nani gunibeä biru' yejcn̄i, luxh naj agubansacni loj rebengut.

<sup>17</sup> Sa'csi lagajc Herodes gunibee biga' Juan, dxejc bacuaduurenini con cadenguiib neṅ latzguiib, xcälṅnasa'c Herodías. Herodías gujc chääṅ Lib, bejtz Herodes, dxejc cua' Herodes gunaaga si'c chääṅni.

<sup>18</sup> Räjp Juan loj Herodes:

—Xhet laadi rbäznäjlu chääṅ bejtzlu.

<sup>19</sup> Ni'cni rdxechlajz Herodías loj Juan, luxh rla-jzni ju'tnini, luxh di niajcdini <sup>20</sup> sa'csi rdxejb Herodes Juan, sa'csi najnni beṅsa'c, beṅdxan najc Juan, ni'cni dini nusaan niujn Herodías latsiajni.

Mase dini gacbesa'c ni rnii Juan, rucuardiagsa'cni xtiidxni. <sup>21</sup> Niluxh guyu' xmood Herodías. Che gojł laj Herodes, bayaanni rexpejñni ni rnibee, nájza rebejñ nani sajc nez región Galilee. <sup>22</sup> Dxejcti biu' xindxa'p Herodías cadre cayajwreni, baya'ni nez lojreni. Bidxaglazduxh Herodes nájza rexpoozni baya' gunaaga, xindxa'p Herodías. Dxejc räjp Herodes lo gunaaga:

—Gunab ni rłajztislu loä, narä sunidxäni.

<sup>23</sup> Dxejcru räplii Herodes lojni:

—Sunidxä xhitis ni guiniablu. Mase gala' yuj ni rnibeä.

<sup>24</sup> Biriitini neñ yu', huiye'tzni loj xnanni, räjpnii:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

<sup>25</sup> Huigajcni loj reii, sas gunabni lojni, räjpnii:

—Rlazä gunidxgajclu loä yejc Juan ni rutiobnis. Neñ te pla't baniidx yejcni.

<sup>26</sup> Dxejcti guc-huinuxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rłajzni nudxojnii nani gunab gunaaga lojni.

<sup>27</sup> Baxhalgajc reii te soldaad ni rcanäj ro'c, baxhalñini, te chaxiini yejc Juan. <sup>28</sup> Ni'c huij, dxejcti bagu'tni Juan neñ latzguiib, biädnätini yejc Juan neñ te pla't. Badeedtinini loj gunaaga. Dxejcti gunaaga badeednini loj xnanni.

<sup>29</sup> Che biejn diajg rexpejñpac Juan si'c, biädläsreni togoalga. Dxejcti bacua'tzrenini neñ te baa.

*Bayaan Jesús gaii mil bejn*  
(Mt. 14:13-21; Lc. 9:10-17; Jn. 6:1-14)

<sup>30</sup> Che gubi' renani baxhal Jesús, bijreni diidx guiraa ni bejnreni nájza ni baluiireni. <sup>31</sup> Dxejc rájp Jesús lojreni:

—Col<sub>l</sub>taa, xtebnu cho<sub>n</sub>nu cadre rut rbájzdi, guisilaaznu tudxe'n.

Rájp Jesús si'c sa'csi yu' xhidajl bejn ni sää, ni siääd, nicla gal gauureni. <sup>32</sup> Dxejcti sääreni ne<sub>n</sub> te canuu cadre rut rbájzdi. <sup>33</sup> Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzuj<sub>n</sub>reni loj Jesús nájza rexpejn<sub>pacni</sub>, dxejcti bidojpreni lojni. <sup>34</sup> Birii Jesús ne<sub>n</sub> canuu, bahuiini loj be<sub>n</sub>xhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluinireni guiraloj. <sup>35</sup> Che gojl gudxej, gubig rexpejn<sub>pacni</sub> lojni, rájpreni:

—Rut rbájzdi ree, luxh agudxej <sub>n</sub>aj. <sup>36</sup> Baxhal rebejn te cháäreni lo reguejdx, nájza re<sub>r</sub>ench, te chasiireni yätxtiil gauureni sa'csi xheti xhi gauureni ree.

<sup>37</sup> Dxejc rájp Jesús lojreni:

—La'tu col<sub>l</sub>deed xhi gauureni.

Dxejc rájpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebe<sub>n</sub>xhidajlre?

<sup>38</sup> Dxejcti rájp Jesús lojreni:

—¿Bal yätxtiil rajptu? Col<sub>l</sub>chahuii.

Che gojnreni balni dxejc rájpreni:

—Gaii yätxtiil, nájza tiop báj<sub>l</sub>.

<sup>39</sup> Dxejcru gunibee Jesús rájpreni loj guiraa rebejn:

—Colcuj xcuaxcuatu loj guixhaya'.

<sup>40</sup> Sas gurej xcuaxcuareni. Yu' lajt gurej tegayuureni, yu' lajt gurej garol gayuureni. <sup>41</sup> Dxejcti cua' Jesús guigaii yätxtiilga näjza guiro'p bäljga, bahuiini xhaguibaa, badeedni xquixhtios loj Dios. Dxejcti gula'ni yätxtiil näjza guiro'p bälj, badeednini loj rexpejn<sub>pacni</sub> te badeedrenini loj guiraa reben<sub>xhidaalga</sub>. <sup>42</sup> Dxejc gudajw guiraareni, gudxaj xque'reni. <sup>43</sup> Dxejcru batojpreni tzubitiop dxijm<sub>guidxadoo</sub> yätxtiil näjza bälj ni bia'n. <sup>44</sup> Luxh loj guiraa rebejn ni gudajw yu' si'cti gaii mil niguii.

### *Guzaj Jesús loj nis*

*(Mt. 14:22-27; Jn. 6:16-21)*

<sup>45</sup> Gunibee Jesús jiu' rexpejn<sub>pacni</sub> nen<sub>canuu</sub>, chägajcreni Betsaida, ni tre' dejtz nis stelaad, la<sub>ni</sub> cagusadiid<sub>xni</sub> rebejn. <sup>46</sup> Che gulujx basadiid<sub>xnireni</sub>, sääni nen<sub>redane'</sub>, sanabni lo Dios. <sup>47</sup> Cheni acayu' guxhij<sub>n</sub>, yu' rexpejn<sub>pacni</sub> nen<sub>canuu</sub> galäi<sub>ni</sub> nis la<sub>ni</sub> ni suga' Jesús xtebni ro' nis. <sup>48</sup> Dxejcti bahuii Jesús abadxajgreni cagusajreni xcanuureni, sa'csi säbduxh bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rlajzni ninijdni lojreni. <sup>49</sup> Dxejc che bahuiireni sasaj Jesús loj nis, naareni pet te ben<sub>malni</sub>, ni'c guredxa'reni. <sup>50</sup> Guiraareni bahuiireni lojni, bidxebduxhreni. Sas gunigajcni lojreni, räjpni:

—Colsutijp lajztu. Laa naräni. Na'c guidxejbtu.

<sup>51</sup> Dxejcti huä'p Jesús nen<sub>canuu</sub> cadro yu'reni. Lagajc dxejc biacdxi bej, luxh laareni bidxelo-  
duxhreni, <sup>52</sup> sa'csi direni niacbee xhini'c bennäj



Jesús reyätxtiil. Guc najd lajzreni, ni'c direni ni-acbee.

*Basiajc Jesús rebenracxhuu neṅ guedx Genesare't  
(Mt. 14:34-36)*

<sup>53</sup> Gudejdreni lo nis, bidzujṅreni lo yuj xten Genesare't. Ro'c bacuaduureni canuu ro' nis. <sup>54</sup> Che biriireni neṅ canuu, biembegajc rebejṅ Jesús, <sup>55</sup> dxejcti birii rebejṅ guideb nejzga. Guslojti siädnäreni benracxhuu loj Jesús, naga' rebenracxhuuga lo da'. Cadrotis rieṅ diajgreni yu' Jesús riädnäreni rebenracxhuu. <sup>56</sup> Niluxh cadrotis rij Jesús, neṅ reguedxbäz, neṅ reguedxro, näjza loj rerench, rguixhreni rebenracxhuu cadre rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajṅ xhajb Jesús.

## 7

*Nani runijt lastoo bejṅ  
(Mt. 15:1-20)*

<sup>1</sup> Dxejcti refarisee, renani najc benguidoo loj guedx Israel, näjza gaii rebejṅ ni ruluui leii, renani birii Jerusalén, bidojpreni loj Jesús. <sup>2</sup> Bahuiireni cayajw gaii rexpejṅpac Jesús, luxh canii rebejṅ nacdXuudx naareni (dee säloj direni quiib ṅaareni si'ctis ni rdiib ṅaa reben lajdxreni). Ni'cni guniyajreni rexpejṅpac Jesús. <sup>3</sup> (Guiraa rebejṅ xten Israel, näjza refarisee, sasanäj nani baluii rebengool ni yu' guedx Israelreni. Direni gauu palga direni quiib ṅaareni balti huält. <sup>4</sup> Che rbi'reni rijreni lo guii, rguibsa'creni ṅaareni, lojreni, ni'reni, dx-ejcti rajc rajwreni. Niluxh guyu' xhidajl costumbr ni sasanäjruren, luxh yu' mood rguuibreni

restrastreni nájza rexplooreni, nájza restrastgui-  
ibreni, nájza rexloonreni.) <sup>5</sup> Dxejc gunabdiidx re-  
farisee nájza rebejn ni ruluii leii loj Jesús, rájpreni:

—¿Xhicuent di rexpejn paclu gun si'cni baluii  
rebejn gool, niluxh rajwreni guideb nacdXuudx  
naareni?

<sup>6</sup> Dxejcti gunii Jesús lojreni rájpnii:

—¡Bejn guiidx! Laaca gunii Isaías xcuenttu che  
guniini xtidx Dios. Scree cajni loj guiitz:

Guejdxre sanälajz narä con rextiidxni,  
niluxh lastooreni zitra suga' loä.

<sup>7</sup> Xlia'si ruzuxhijbreni, sa'csi direni chanälajz narä.  
Ruluiireni si'c xtiidxpac Dios nani rnii rebejn.

<sup>8</sup> Rusa'ntu xleii Dios, sasanädzu'tztu costumbr nani  
baluii rebejn gool. Rdibsa'c rexploortu, restrasttu,  
luxh rujnzatu xhidajlru cos sa' redee.

<sup>9</sup> Rájpa Jesús lojreni:

—Rusa'ntu xtidx Dios te risanäjtu recostumbr  
xtentu. <sup>10</sup> Sa'csi rájp Moisés: “Huinälajz xtadlu con  
xnanlu.” Rájpzani: “Suju'tpactu nani gudzubde  
yejc xtadni o yejc xnanni.” <sup>11</sup> Niluxh la'tu rniitu  
sajc gäb bejn loj xtadni o loj xnanni: “Dina gapä  
xhi cojn gacnäälü” (nani säloj, abadedä guira'ti loj  
Dios). <sup>12</sup> La'tu ditu gusaan gunru bejn por xtadni  
nicla por xnanni. <sup>13</sup> Si'c rbälaztu xtidx Dios, te  
sasanäjtu recostumbr nani ruluiitu, luxh xhidajl  
cos sa' dee rujntu.

<sup>14</sup> Gurejdx Jesús guiraa rebejn, dxejc rájpnii loj  
guiraareni:

—Colcuadiajg, colyabee xtidxä. <sup>15</sup> Rexhicos  
yälrajw ni rajw bejn, dini gunijt bejnga, rediidx  
ni rii nejn lastoo bejn, nájza recos ni rujn bejn,

ni'c runijt bejn̄ga. <sup>16</sup> Pal yu' chu rlanj guisieed, sucuadiajgni.

<sup>17</sup> Dxejcti gula'reni loj rebeñxhidaal, biu'reni neñ yu'. Dxejc gunabdiidx rexpejn̄pacni loj Jesús xhi säloj cuent ni guniini. <sup>18</sup> Basejc Jesús diidx lojreni, räjpni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' neñ bejn̄ digacdi gunijtni lastoo bejn̄, ä? <sup>19</sup> Sa'csi dini jiu' neñ lastooni; riu'ni xque'ni, rdejdtini.

Si'c guniini te baluini guira'ti xhicos najc naya.

<sup>20</sup> Dxejc räjpni:

—Rediidx ni rii neñ lastoo bejn̄, näjza recos ni rujn bejn̄, ni'c sii runijt lastoo bejn̄. <sup>21</sup> Sa'csi neñ lastoo rebejn̄ rii rexhigabguijdx, näjza yälresnäjä chääl sa'ni, yälresnäjä ni xhet najc di chääl ni, yälrugut sa'ni, <sup>22</sup> yälgubaan, yälrlajzni ga'pni xhixhten bejn̄, yällatsiaj, yälrusgueeni, yäl xheti xtujy lojni, yälrdxechlajz, yälrudzubde sa'ni, yälñayechlajzni, yälguyalajz. <sup>23</sup> Guiraa reyällatsiajre neñ lastoo bejn̄ riireni, luxh reni'csi runijt bejn̄.

*Tej guna Sirofenicia ni bililajz xtidx Jesús  
(Mt. 15:21-28)*

<sup>24</sup> Dxejc biriini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlanjzi niacbee rebejn̄ caro yu'ni, niluxh di niajcdi niuxhiga'tztisni. <sup>25</sup> Biengajc diajg te gunaa ro'c yu' Jesús. Xinxape' gunaaga yu' beñdxab neñ lastooni. Bidzujñ gunaaga, bazuxhijbni lo Jesús. <sup>26</sup> Gunaaga rnii griegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni. <sup>27</sup> Dxejc räjp Jesús lojni:

—Basaan gauxгаа rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

<sup>28</sup> Dxejc gunii gunaaga, räjpni loj Jesús:

—Yo, Dad. Näjza rebäcue' ni suga' neṅ mex rajw nani rtejb ro' rebiuux.

<sup>29</sup> Dxejcti räjp Jesús lojni:

—Laaca rniliilu. Huij rolijzlu. Abirii beṅdxab neṅ lastoo xindxape'lu.

<sup>30</sup> Luxh che bidzujṅ gunaare rolijzni, a dxape' naga' lo da'. Gucbegajc gunaaga abirii beṅdxab neṅ lastoo dxape'ga.

### *Basiajc Jesús te beṅgop*

<sup>31</sup> Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujṅtini ro' nis xten Galilee. <sup>32</sup> Biädnä gatii bejṅ te niguii ni nacua't diajgni lo Jesús. Digacdiza guinisa'c niguiiga. Biäd nabreni lo Jesús nusujni ṅaani yejc niguiiga. <sup>33</sup> Dxejcti badzucajnini loj re-bejṅ. Baquitzgajcni rebicueṅaani neṅ diajgni, dxe-jcru batiobxhejnini, gudajṅtini lujdxni. <sup>34</sup> Bahuiini xhaguibaa, bazaa lajzni, dxejc räjpni:

—¡Efata! —nani säloj bixal.

<sup>35</sup> Dxejcru bixalgajc rediajgni, gubaṅgajc lujdxni, gunisa'cni. <sup>36</sup> Dxejcti gunibee Jesús rutlojdi gäbreni, per che räjpni lojreni si'c, laareni batie'chrureni diidxga. <sup>37</sup> Rdxeloduxhreni, räjpreni:

—Guira'ti laaca rujnni; ruxhalni diajg redi-agcua't, luxh rusniini regop.

## 8

*Bayaan Jesús tajp mil bejn*  
*(Mt. 15:32-39)*

<sup>1</sup> Neñ redxejga bidojp xhidalro bejn, luxh xheti xhigauureni. Dxejc gurejdx Jesús rexpejn<sub>n</sub>pacni ni rinajl<sub>n</sub>i, räj<sub>n</sub>pni lojreni:

<sup>2</sup> —Rulazlazä rebejn<sub>n</sub>re, sa'csi ñaj rajc choñ dxej tre'reni loä, luxh xhet yu'di gauureni. <sup>3</sup> Niluxh palga guxhaläreni rolizreni, xliajzreni, sidxaj-greni lo nejz; sa'csi yu' renani zijtru siädreni.

<sup>4</sup> Dxejcru räj<sub>n</sub>p rexpejn<sub>n</sub>pacni lojni:

—¿Caro chaca'nu yätxtiil te cha xque' rebejn<sub>n</sub>re ree, cadre rut rbäjzdi?

<sup>5</sup> Sas gunabdiidx Jesús lojreni:

—¿Bal yätxtiil rajptu?

Dxejcru räj<sub>n</sub>preni:

—Gajdz<sub>n</sub>tisni.

<sup>6</sup> Gunibee Jesús gurej rebeñxhidaalga loj yuj. Sas cua'ni guigajdx yätxtiilga, badeedni xquixhtios lo Dios, gula'ni reyätxtiilga. Dxejc badeednini loj rexpejn<sub>n</sub>pacni te guteedrenini loj rebeñxhidaal. Bateedtireni yätxtiilga lo rebeñxhidaalga. <sup>7</sup> Rajpzareni gaii bälbáz, dxejcti badesac Jesús xquixhtios lo Dios, gunibeeni bateedzareni rebälbázre loj rebeñxhidaalga. <sup>8</sup> Dxejc gudajwreni, gudxaj xque'reni. Dxejc batojp rexpejn<sub>n</sub>pac Jesús gajdz dxijm<sub>n</sub> reyätxtiil ñaj rebäj<sub>n</sub>l dxuc ni bia'n. <sup>9</sup> Niluxh renani gudajwga najcreni si'cti tajp mil bejn. Dxejcti basadiidxnireni. <sup>10</sup> Biunägajc Jesús rexpejn<sub>n</sub>pacni neñ canuu, biädreni nez Dalmanuta.

*Gunab refarisee te senro loj Jesús*

*(Mt. 16:1-4; Lc. 12:54-56)*

<sup>11</sup> Biääd refarisee, renani najc rebenguidoo loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni.

<sup>12</sup> Dxejcti bazaa lajz Jesús neñ lastooni, räjpni:

—¿Xhicuent rlaiz rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

<sup>13</sup> Dxejcti basa'nnireni ro'c, biusacni neñ canuu, sä'tini stelaad nisga.

*Levaduur xten refarisee*

*(Mt. 16:5-12)*

<sup>14</sup> Biallajzreni nica'reni yätxtiil, luxh xhetliidi sanädireni. Tejtis yätxtiil nuureni neñ canuu.

<sup>15</sup> Cagulijdx Jesús rexpejn pacni, räjpni lojreni:

—Col<sub>s</sub>usin, col<sub>n</sub>ati levaduur xten refarisee, col<sub>n</sub>atiza levaduur xten Herodes. (Nalajznu, xtiidxreni najc si'c levaduur.)

<sup>16</sup> Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

<sup>17</sup> Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La laltis nacnajd lastootu? <sup>18</sup> ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj?

<sup>19</sup> Che gula'a guigaii yätxtiil te gudajw gaii mil niguii, ¿bal dxijm yätxtiil biujy batojptu?

Sas räjpreni lojni:

—Tzubitio'pni.

20 —Che gula'a guigajdz yätxtiil te gudajw tajp mil bejn, ĉbal dxijm yätxtiil biujy batojptu?

Sas räjpreni:

—Gajdzni.

21 Dxejc räjpni lojreni:

—ĉLa gajdtu gacbesa'c xhi benä?

### *Basiajc Jesús te lotiä'p Betsaida*

22 Bidzunāj Jesús rexpejn<sub>pacni</sub> guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejn<sub>ga</sub>. 23 Dxejc gunaazni naa lotiä'pga, guläänini nen<sub>ga</sub> guejdx. Che batiobxhejn<sub>ni</sub> nen<sub>ga</sub> rebaloj<sub>ni</sub>, basugajc<sub>ni</sub> naani yejc baloj lotiä'pga, gunabdidxgajc Jesús:

—ĉLa yu' xhi rhuiilu, ä?

24 Luxh che bahuii bejn<sub>ga</sub> räjpni:

—Rhuiä sasaj rebejn, luxh si'c yajg rhuiä lojreni.

25 Basusac Jesús naani yejc rebaloj bejn<sub>ga</sub>. Dxejc bejn Jesús bahuii bejn<sub>ga</sub>. Biajctini, zijtru gujc bahuisa'cni lo guiraa rebejn. 26 Dxejcti baxhal Jesúsni rolijz<sub>ni</sub>, räjpni:

—Basquejn, huijga rolijzlu, na'c jiu'lu nen<sub>ga</sub> guejdx, na'c gäblu xhi gujclu lo rebejn ni yu' nen<sub>ga</sub> guejdx.

### *Basule' Pedr Jesús najc Crist*

*(Mt. 16:13-20; Lc. 9:18-21)*

27 Birināj Jesús rexpejn<sub>pacni</sub> lo reguejdx ni ria'n nez Cesarea xten Filipo. Lalni sasajreni lo nejz räjp Jesús loj rexpejn<sub>pacni</sub>:

—ĉChuni'c rnii rebejn nacä narä?

28 Sas räjpreni loj<sub>ni</sub>:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn ni gunii xtidx Dios.

<sup>29</sup> Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

<sup>30</sup> Dxejcti räjp Jesús lojreni:

—Rutlojdi gäbtu chu nacä.

### *Gunii Jesús xho guetni*

*(Mt. 16:21-28; Lc. 9:22-27)*

<sup>31</sup> Dxejcti gusloj Jesús caguluiini rexpejn<sub>u</sub>pacni, räjpni:

—Narä nacä Xi'n Dios, ni gujc Niguui. Nanabpac tedä trabajwduxh. Sibälaz rebe<sub>u</sub>gool ni najc guxhtis ne<sub>u</sub> guedx Israel narä, näjza renani rnibee loj rebixhojz, näjza rebejn ni ruluii leii: sugu'treni narä, luxh ni riojn dxej guiban<sub>s</sub>sacä lo rebe<sub>u</sub>gut.

<sup>32</sup> Guyasi guniini rediidxre. Sas huiinä Pedr Jesús telaad, dxejc räjpni loj Jesús:

—Na'c guiniilu si'c.

<sup>33</sup> Dxejc batzuré loj Jesús, bahuiini loj rexpejn<sub>u</sub>pacni. Dxejc gudil<sub>n</sub>äjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejntis rujnlu.

<sup>34</sup> Dxejc gurejdxni reben<sub>x</sub>hidaal con reni najc xpejn<sub>u</sub>pacni, räjpni lojreni:

—Palga yu' chu r<sub>l</sub>ajz gac xpe<sub>n</sub>äpac, sucuääz gunni ni rsia' lajzni gunni, sutedni trabajw si'c tej ni caj lo cru<sub>j</sub>z, sujiäd<sub>n</sub>ajlni narä. <sup>35</sup> Sa'csi nani r<sub>l</sub>ajz gus<sub>l</sub>aa xcäl<sub>n</sub>abaj<sub>n</sub>ni, sunijtni xcäl<sub>n</sub>abaj<sub>n</sub>ni. Luxh nani runij<sub>t</sub> xcäl<sub>n</sub>abaj<sub>n</sub>ni xcäl<sub>n</sub>asa'c narä, xcäl<sub>n</sub>asa'c



xtidxä, siliaapac xcäl̄nabaj̄n̄ni. <sup>36</sup> Xliä' ga'p bejn guiraloj lo guedxliujre palga nitni lo Dios par tejpas. <sup>37</sup> Xhet gacdi gudeed bejn te guiban̄näj̄ni Dios. <sup>38</sup> Nani guituinäj narä con rextidxä naj, cheni najc rebejn bendoj̄l, narä, Xi'n Dios nani gujc Niguui, situinäazani che jiädnaä reangl xten Dios che jiälää lo xcäl̄rdimbicha' Xtadä.

## 9

<sup>1</sup> Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiääd xcäl̄rnibee Dios.

*Gubixhlo Jesús garenca*

*(Mt. 17:1-13; Lc. 9:28-36)*

<sup>2</sup> Che gudejd xho'p dxej, Jesús cua' Pedr, näj Jacoob, näjza Juan, laatisreni huinäni yejc te danro. Ro'c gubixhlojni garenca lojreni. <sup>3</sup> Gusloj rdimbicha' rexbaj̄bni, gujc xhaj̄bni nolbäj. Rut rajcti rusquijtz lajd lo guedxliujre si'c biquijtz xhaj̄bni. <sup>4</sup> Dxejc baluiiloj Elías näjza Moisés lojreni, cayuinäjreni Jesús diidx. <sup>5</sup> Sas räjp Pedr loj Jesús:

—Dad, laaca dxunnu ree. Naj jiennu chon yuguixa', tejni xtenlu, steeni xten Moisés, steeni xten Elías.

<sup>6</sup> Si'c guniini sa'csi nicla niacbeeni xhini'c guiniini, sa'csi cadxebduxhreni. <sup>7</sup> Dxejc biääd te za bejn balaa yejcreni. Neñ zaga biejn xse' te ni räjp:

—Dee najc xi'nä nani sanälazä, col̄cuadiajg xtiidxni.

<sup>8</sup> Che batzuré lojreni, bahuiireni rutru suganäjti Jesús, xtebtis Jesús suga'.

<sup>9</sup> Che siädjiäjtreni dajnga, gunibee Jesús rut lojdi guiniireni xcuent ni bahuiireni, guiban̄xgaasi Xi'n

Dios nani gujc Niguui lo rebengut. <sup>10</sup> Basälcheereni rediidxre neñ lastooreni. Dxej cru canabdiidx lo sa'reni xhicha säloj guibañsacni lo rebengut. <sup>11</sup> Sas gunabdiidxreni lojni, räjpreni:

—¿Xhicuent rnii remastr xten leii naquiinpac jiaäxgaa Elías?

<sup>12</sup> Dxejcti bazej cni diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijt z xcuent Xi'n Dios ni gujc Niguui, sidejdni trabajwduhx, rutza juidini? <sup>13</sup> Luxh narä rniä lojtu, abiääd Elías, luxh bennäjrenini si'ctis ni rlazreni, si'cpac ni caj loj guijt z ni rusule' xcuentni.

*Basiajc Jesús te biuux ni guyu' bendxab neñ lastooni*

*(Mt. 17:14-21; Lc. 9:37-43)*

<sup>14</sup> Che asiäädreni cadro tre' sgaii rexpejn pac Jesús, bahuiireni loj xhidalro bejn ni tre' lojreni, luxh cayeinäj rebejn ni ruluii leiireni. <sup>15</sup> Che bahuii guiraa rebejn loj Jesús, bixeloduxhreni, baxunreni, huiye'tzreni xchan lojni. <sup>16</sup> Dxejc gunabdiidx Jesús lojreni:

—¿Xhini'c rusieinäjtu laareni?

<sup>17</sup> Sas gunii tej reni yu' lo benxhidaalga, räjpni:

—Dad, ree siädnaä xi'nä lojlu, yu' bendxab neñ lastooni, nani rujn najcni gop. <sup>18</sup> Cheni rni-aaznini, rutienta'ni xi'nä, luxh riduxh bitzun ro'ni, näjza rauya'ni ro'ni, luxh cabijdzni. Aräpä loj rexpejn pac lu cuääreni bendxabga, niluxh di niajcdi nibäärenini.

<sup>19</sup> Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusiedtu narä? ¡Coltanäni loä!

<sup>20</sup> Dxejc biädnäreni biuuxga lojni. Che bahuii beṇdxab lo Jesús, basnijni bi'nga, basälta'tinini lo yuj. Sädiidxni, luxh carii bitzuṇ ro'ni.

<sup>21</sup> Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz. <sup>22</sup> Balti huält rusälṇini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

<sup>23</sup> Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

<sup>24</sup> Guredxa' xtad bi'nga, räjpni:

—¿Rililazä! Gucnäṇ narä te chaliiru lazä.

<sup>25</sup> Che bahuii Jesús bixa't xhidajl bejṇ lojni, gu-didxa'ni lo beṇdxabga räjpni lojni:

—Beṇdxab ni rujn gop, narä canibeä, birii neṇ lastoo bi'nga. Na'cru chulu neṇ lastooni.

<sup>26</sup> Dxejcru guredxa' beṇdxabga, luxh basnibzejsni bi'nga, dxejcru biriini neṇ lastooni. Astoo te beṇgut bia'n bi'nga ro'c. Xhidajl rebejṇ räjp:

—Agujtṇi.

<sup>27</sup> Dxejc gunaaz Jesús ṇaa bi'nga guläsnini. Guzuliiti bi'nga. <sup>28</sup> Dxejcti che abiu' Jesús neṇ yu', gunabdiidx rexpejṇpacni lojni:

—¿Xhicuent di niajcdi nibäänu beṇdxabga?

<sup>29</sup> Dxejc räjp Jesús lojreni:

—Di gacdi cuäätu sa' beṇdxabre palga ditu cuedx-guinab lo Dios, palga ditu gucuaṇxgaa.

*Gunisac Jesús xho guetni  
(Mt. 17:22-23; Lc. 9:43-45)*

<sup>30</sup> Dxejc biriireni ro'c, gudejdreni Galilee. Luxh di rlajz Jesús niacbee rebejn sadejdreni nejzga, <sup>31</sup> sa'csi caguluiini rexpejnpacni. Cayäjpni lojreni: “Xi'n Dios ni gujc Niguii sidejdni ladzṅaa rebejn, niluxh sugu'trenini. Che guiza' chon dxej gujtni, sibajṅni stehuält.” <sup>32</sup> Niluxh laareni direni niacbee xhini'c guniini, bidxejzbareni niniabdi-dxreni lojni.

*¿Chuni'c sajcru?*

*(Mt. 18:1-5; Lc. 9:46-48)*

<sup>33</sup> Bidzujṅtirenireni Capernaum. Che biu'ni neṅ yu' räjpni lojreni:

—¿Xhini'c cagusiejyту lo nejz?

<sup>34</sup> Dxejc xhet guniitireni, sa'csi laareni cagusieinäj sa'reni lo nejz don chuni'c sajcru lojreni.

<sup>35</sup> Sas gurej Jesús, dxejc gurejdxni guitzubitio'p xpejnpacni, räjpni lojreni:

—Palga yu' chu rlajz gasajcru lojtu, sugacxgaani si'c te nani xhet sajcti, sugunzani xtzuun chutis.

<sup>36</sup> Dxejcti cua'ni tej biuxbäz, huinänini galäiireni. Dxejc gudääzni biuxbäzga, räjpni lojreni:

<sup>37</sup> —Chutis ni gacnäj te rebiuxe're sa'csi rinälajzni narä, sacnäjni narä, luxh nani gacnäj narä, xhet narätis gacnäjtini, näjza xtadä nani baxhal narä racnäjni.

*Nani di guiniyaj nuunu, xladnu yu'ni*

*(Lc. 9:49-50; Mt. 10:42)*

<sup>38</sup> Dxejcti gunii Juan räjpni lojni:

—Bahuiinu lo te bejn ni rbää beṅdxab con xcälṅnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

<sup>39</sup> Dxejc räjp Jesús lojni:

—Na'c gudxo<sub>j</sub>ntu gunni si'c sa'csi bejn nani rujn milagwr con xcäl<sub>r</sub>nibee laä digacdi guiniyagajcni narä. <sup>40</sup> Nani di guidxagdijl nuunu, xlaadnu yu'ni. <sup>41</sup> Rniliäpac lojtu, chutis ni guniidx te bas nis lojtu sa'csi najctu xpejn<sub>p</sub>ac Crist, siguijx Diosni xcuent nani bejn<sub>n</sub>i.

*Nani rujn jiajb bejn lo dojl*

*(Mt. 18:6-9; Lc. 17:1-2)*

<sup>42</sup> 'Chutis ni gusiu' tej rebiuxe' ni rililajz narä nen dojl, sugal te guimolin yejn<sub>n</sub>i dxejcti gucuaarenini lo nisdoo. <sup>43</sup> Palga tej naalu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p naalu gusälreni luj gabijl, loj bajl ni di jiuui, <sup>44</sup> cadro diza xpisiujgreni guet, diza bajl jiuui. <sup>45</sup> Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu luxh chääl<sub>u</sub> gabijl, lo bajl ni di jiuui, <sup>46</sup> cadro di xpisiujgreni guet, diza bajl jiuui. <sup>47</sup> Luxh palga tej balojlu gun gunlu dojl, gulääni: hueenru chääl<sub>u</sub> cadro rnibee Dios natiä'p lojlu quela sojb guiro'p balojlu chääl<sub>u</sub> gabijl, <sup>48</sup> cadro di xpisiujgreni guet, diza bajl jiuui.

<sup>49</sup> 'Si'cni rloj sejd yejc xhi cos yäl<sub>r</sub>rajw, si'cza guiloj bajl yejc guiraareni. Guilojza sejd lo guira'ti ni rdeed bejn lo Dios. <sup>50</sup> Hueen najc sejd, luxh palga agudejd yäl<sub>n</sub>adzij yejcni, ¿xho guntu te gacsacni nadzij? Col<sub>y</sub>ajc nadzij la'tu, col<sub>g</sub>uiba<sub>n</sub>näsa'c sa'tu.

## 10

*Baluu Jesús xcuent rä<sub>r</sub>ru<sub>o</sub>'n sa'ni*

*(Mt. 19:1-12; Lc. 16:18)*

<sup>1</sup> Dxejcru birii Jesús ro'c huijni nez Judea nájza nez ro' gueu Jordán stelaad. Ro'c bidojp xhidajl bejn lojni stehuält, sas guslosacni caguluinireni si'ctis ni ruluiinireni. <sup>2</sup> Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan cháälni, ä?

<sup>3</sup> Dxejc laani bazejcní diidx, räjpni lojreni:

—¿Xhini'c gunibee Moisés guntu?

<sup>4</sup> Dxejcru räjpreni:

—Moisés basaan gudeedni te guitiz gusaan cháälni che guro'nini.

<sup>5</sup> Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. <sup>6</sup> Niluxh che birixtiej beñ guedxliuj, “niguii con gunaa benchee Diosreni.” <sup>7</sup> “Ni'cni te niguii siriini loj xtadni, loj xnanni te cuáznájni cháälni. <sup>8</sup> Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni. <sup>9</sup> Na'c gudzucaj bejn lo sa bejn ni nani abachaag Dios lo sa'ni.

<sup>10</sup> Che biu'reni neñ yu' gunabdidxsac rexpejn pacni lojni xcuent rediidxre. <sup>11</sup> Dxejc räjpni lojreni:

—Chutis niguii ni gusaan cháälni, sas guchnaani ste'cani, rujnni dojl. <sup>12</sup> Niluxh palga gunaa guro'n cháälni sas guchnaani ste'ca niguii, rujnzani dojl.

*Gunab Jesús gunle' Dios yejc rebiuxbáz  
(Mt. 19:13-15; Lc. 18:15-17)*

13 Biädnäza rebejn biuxbäz lojni te gutzuub Jesús naani yejcreni, sas gudidxa' rexpejn pacni lojreni. 14 Che bahuii Jesús xhi cayujn rexpejn pacni, bidxe' chni räjpni lojreni:

—Colsaan jiäd rebiuxbäz loä. Na'c gudxojn-tureni, sa'csi xcälrnibee Dios najc xten reni najc nadolajz si'c najc biuxbäz. 15 Rniliäpac lojtu, chutis ni rlanj jiu' lo xcälrnibee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälrnibee Dios.

16 Dxejcti gudääz Jesús rebiuxbäz, bazujzani naani yejcreni, gunab Jesús gunle' Dios yejcreni.

*Te bi'n ni rapduxh guninäy Jesús  
(Mt. 19:16-30; Lc. 18:18-30)*

17 Che birii Jesús loj xnejzni, ruxun te niguii biäd lojni, bazuxhijbni. Dxejcti gunabdiidx niguiiga lojni räjpni:

—Dad, beṇsa'c, ¿xhini'c gunä te xca'ä yäl nabajn par tejpas?

18 Sas räjp Jesús lojni:

—¿Xhicuent rniilu loä beṇsa'c? Tejtisni najc beṇsa'c; Diostis najc beṇsa'c. 19 Najnlu xhini'c gunibee Dios gunni: “Na'c guesnäjlü chääl sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huiälajz xtadlu, xnanlu.”

20 Dxejc räjp niguiiga lojni:

—Dad, guiraa redee cayunä cheni gucäli bi'n.

21 Che bahuii Jesús lojni, huiälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani diga'p,

dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

<sup>22</sup> Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhix-tenni yu'.

<sup>23</sup> Dxejc bahuii Jesús guideb gabi lojreni, räjpni loj rexpejn<sub>pacni</sub>:

—Naganduxh jiu' rebejn nani yu'duxh xhix-tenni lo xcäl<sub>rnibee</sub> Dios.

<sup>24</sup> Dxejc bidxelo rexpejn<sub>pacni</sub> che biejn diajg<sub>reni</sub> rextiidxni. Dxejc räjp Jesús lojreni stehuält:

—¡Aiiitu xi'nä!, lacti naganduxh gusaan renani sanälajz xhixtenni guinibee Diosreni. <sup>25</sup> Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

<sup>26</sup> Dxejc bidxeloduxh<sub>reni</sub>, räjp<sub>reni</sub> lojni:

—¿Chuxhni'c sajc laa lo dojl?

<sup>27</sup> Dxejc bahuii Jesús lojreni, räjpni:

—Bejn digacdi gus<sub>laa</sub> sabejn<sub>ni</sub>, Diostis rajc rus<sub>laa</sub> bejn lo dojl, sa'csi Dios rac rujn guira'ti.

<sup>28</sup> Sas gusloj Pedr cayäjp lojni:

—Naj nuure ahuilälaznu guira'ti te siopnajl<sub>nu</sub> luj.

<sup>29</sup> Dxejc räjp Jesús:

—Rniliäpac lojtu, chutis nani cuälaz rolijz<sub>ni</sub>, rebejt<sub>ni</sub>, rebisiaj<sub>nni</sub>, xtad<sub>ni</sub>, xnann<sub>ni</sub>, chääln<sub>ni</sub>, rexi'nni, rexyuj<sub>ni</sub>, xcäl<sub>nasa</sub>'c narä, näjza xcäl<sub>nasa</sub>'c xtidx Dios, <sup>30</sup> sica'ni lo guedxliujre te gayuu huält xhidajlru. Sica'ni rolijz<sub>ni</sub>, rebejt<sub>ni</sub>, rebisiaj<sub>nni</sub>, xnann<sub>ni</sub>, rexi'nni, rexyuj<sub>ni</sub>. Sisiunajlrenini naj, dxejc xhaguibaa sica'ni yäl<sub>nabaj</sub>n par tejpas.

<sup>31</sup> Xhidajl rebejn nani sajc lo guedxliujre xhet



sajcdireni xhaguibaa; niluxh rebejn nani xhet sajcdi lo guedxliujre, xhaguibaaru gasajcreni.

*Gunisac Jesús diidx xho guetni*

*(Mt. 20:17-19; Lc. 18:31-34)*

<sup>32</sup> Dxejcru sasaj Jesús, nijdni lo rexpejn<sub>pacni</sub> sääreni Jerusalén, luxh cadxelojreni. Cadxejbza rebejn nani sanajlreni. Dxejcti guläsac Jesús rexpejn<sub>pacni</sub> lo rebejn, gusloj cayäjpni lojreni guira'ti nani sacni. <sup>33</sup> Räj<sub>p</sub> Jesús:

—Sionnu Jerusalén, luxh narä, Xi'n Dios nani gujc Niguii, sidedä ladz<sub>naa</sub> rebixhojz nani rnibee näjza rebejn ni rului lei<sub>i</sub>. Luxh sinibeereni guetä. Sutedreni narä lo rebenz<sub>ij</sub>t nani digac xpejn Israel. <sup>34</sup> Suxhisnäjreni narä, siguijnreni narä, sutio<sub>x</sub>hejnzareni loä, dxejcru sugu'treni narä. Che riojn dxej siba<sub>n</sub>sacä.

*Gunab Jacobo näjza Juan te yäl<sub>n</sub>asa'c*

*(Mt. 20:20-28)*

<sup>35</sup> Dxejcti gubig Jacobo näjza Juan, rexi'n Zebedeo, räjpreni lojni:

—Dad, rlaaznu gunlaalu nani guiniabnu lojlu.

<sup>36</sup> Dxejc räj<sub>p</sub> Jesús lojreni:

—¿Xhini'c r<sub>l</sub>ajz<sub>t</sub>u gunä xcu<sub>e</sub>nt la'tu?

<sup>37</sup> Räjpreni:

—Cue tejnu cuä'lu ladbee, xteenu cue cuä'lu ladbä<sub>j</sub>gw che acanibeelu.

<sup>38</sup> Dxejc räj<sub>p</sub> Jesús lojreni:

—Ditu gan xhini'c rniabtu. ¿Xhixh saj<sub>c</sub> yätu nani yä'a? ¿Xhixh saj<sub>c</sub>za guirobnistu si'cni guirobnisä? Nalajznu, xhixh saj<sub>c</sub> tedtu trabajw nani tedä narä.

<sup>39</sup> Sas räjpreni lojni:

—Sajc tednuni.

Dxejc räjp Jesús lojreni:

—Guliini sajc yätu nani yä'a, luxh guirobnistu si'cni guirobnisä narä. <sup>40</sup> Te cue tejtü ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

<sup>41</sup> Luxh che biejn diajg stzuureni bidxe'chreni loj Jacob näjza loj Juan. <sup>42</sup> Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxaglajz gasajcrueni lo rebejn. Luxh rebejn ni sajc rnibeduxhreni lo rebejn. <sup>43</sup> Xhet si'c di guntu la'tu. Chutis nani rlanj gasajcru lojtu, riäjĵ gacni mos lojtu. <sup>44</sup> Luxh chutis la'tu nani rlanj gasajcru, riäjĵ gacni xmos guiraatu. <sup>45</sup> Di Xi'n Dios ni gujc Niguii niääd, te ga'ptisni mos, biäädzani te quiixni con xcäl'nabajni te laa xhidajl bejn lo dojl.

*Basijc Jesús Bartimeo, ni natiä'p lojni*

*(Mt. 20:29-34; Lc. 18:35-43)*

<sup>46</sup> Dxejcti biäädreni Jericó. Che birii Jesús ro' guedx Jericó con rexpejnpacni näjza rebenxhidaal, cuä' nezyuj sobga' Bartimeo, xi'n Timeo. Natiä'p lojni. Ro'c cabääni gojn. <sup>47</sup> Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

<sup>48</sup> Xhidajlreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

<sup>49</sup> Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

<sup>50</sup> Sas roļca xhablajzni gudixhni, huisuliini, biäädtini lo Jesús. <sup>51</sup> Dxejc räjp Jesús lojni:

—Naja', ģxhini'c rļajzlu gunä?

Dxejc räjp lotiä'pga loj Jesús:

—Dad, rļazä gunlu fiä.

<sup>52</sup> Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuini. Sanajltini Jesús lo nejz.

## 11

### *Biu' Jesús Jerusalén*

(Mt. 21:1-11; Lc. 19:28-40; Jn. 12:12-19)

<sup>1</sup> Cheni sadzujņreni gajxh Jerusalén, gudejdreni neņ reguedx Betfagé nājza neņ guedx Betania nez cuä' dajne' ni laa dan Oliib. Baxhaļ Jesús tiop xpejņpacni, <sup>2</sup> räjpni lojreni:

—Coļchäj guedxe' ni ria'n nez lojtu. Che guidzujņtu ro' guejdxga, sidxältu te bure' ni caduu. Gajd bejņ cuibni. Coļxhecni, coļtanägajcni.

<sup>3</sup> Palga yu' chu naa lojtu: “ģXhicuent rujntu si'c?” Coļye'tztis: “Dad caquiinni.” Dxejc suxhalgajcni bure'ga ree.

<sup>4</sup> Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini. <sup>5</sup> Gaii bejņ ni tre' ro'c räjp lojreni:

—ģXhicuent caguxhectuni?

<sup>6</sup> Dxejc räjpreni loj rebejņga si'cni räjp Jesús lojreni gäbreni. Basangajc rebejņga sanäreni bure'ga.

<sup>7</sup> Dxejcru biädnäreni bure'ga loj Jesús. Badzu-ubreni xhablajzreni dejtz bure'ga. Gubijbti Jesús bure'ga. <sup>8</sup> Xhidajlza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

<sup>9</sup> Rebejn ni nijd lojni näj reni sanajl dejtzni guredxa'reni, räjpreni:

—¡Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. <sup>10</sup> Coldeed xquixhtiooz loj Dios sa'csi agubiré xcälrnibee toxtadnu David. ¡Colguiliä'p xpala'n Dios ni yu' jiaro!

<sup>11</sup> Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejn'pacni, sääreni Betania sa'csi agudxej.

*Batzubde Jesús yejc te yagiigw ni xhet cajdi lojni  
(Mt. 21:18-19)*

<sup>12</sup> Che bara yääl, biunejzreni Betania. Dxejcti gusloj calaan Jesús, <sup>13</sup> bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. <sup>14</sup> Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.  
Biejnza diajg rexpejn'pacni.

*Gulää Jesús renani ruto' näj renani rsii nen  
guidoo*

*(Mt. 21:12-17; Lc. 19:45-48; Jn. 2:13-22)*

<sup>15</sup> Dxejcti bidzujnreni guedx Jerusalén. Biu' Jesús nen guidoro. Gusloj cabääni renani ruto' näj renani rsii nen guidoo. Niluxh batiejxhni rexmex renani ruchaa meel, näjza reyagxhil xten renani

ruto' paloom. <sup>16</sup> Diruni nusaan nidednäjreni xhicos nez neŋ guidooga. <sup>17</sup> Dxejc caguluiinireni, räpgajcni lojreni:

—¿La et screedi caj loj guiitz? “Xyu'ä sirilaj yu' cadre rrinab guiraa rebenguedxliuj lo Dios.” La'tu abejntuni si'c xpiliää gubaan.

<sup>18</sup> Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxeloj rextidx Jesús. <sup>19</sup> Che biu' guxhijŋ, birii Jesús guejdxga.

*Gubijdz yagiigw ni bidzubde*

*(Mt. 21:20-22)*

<sup>20</sup> Che bara yääl gudejdreni, bahuiireni agubijdz guideb yagiigw, näj rexlobaani. <sup>21</sup> Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcn, agubijdzni.

<sup>22</sup> Dxejcti gunii Jesús räjpni lojni:

—Colchalilajz Dios. <sup>23</sup> Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. <sup>24</sup> Ni'cni rniä lojtu, xhitis nani guiniabtu lo Dios che rrinäjtuni, colchalilajz xca'tuni, dxejc sica'tuni. <sup>25</sup> Luxh che guiniabtu Dios, palga yu' chu loj rdxechlajztu, colsiäjłza lajztu, te näjza Xtadtu nani yu' xhaguibaa gusiäjłza rextojłtu. <sup>26</sup> Palga ditu gusiäjł lajztu con resa'tu, diza Xtadtu nani yu' xhaguibaa gusiäjł lajzni rextojłtu.

*Yälrnibee xten Jesús*

*(Mt. 21:23-27; Lc. 20:1-8)*

<sup>27</sup> Sas bidzunsacreni guedx Jerusalén. Laḷ ni sasaj Jesús neḡ guidoro, rebixhojz nani rnibee, nājza rebejḡ ni ruluii leii, nājza reguxhtis gubig lojni.

<sup>28</sup> Rājpreni lojni:

—¿Xhi yälrnibee rajplu, ni'c rujnlu redzuunre?  
¿Chu baniidx yälrnibee rujnlu redzuunre?

<sup>29</sup> Dxejc rājḡ Jesús lojreni:

—Guiniabdidxäza lojtu. Coḷtzu'ni loä, dxejcti guiniäza xhi yälrnibeere rapä ni'c runä redzuunre.

<sup>30</sup> ¿Chu baxhaḷ Juan ni batiobnis? ¿La Dios o la rebejḡ? Colnii loä naj.

<sup>31</sup> Dxejcti gunii loj sa'reni, rājpreni:

—Palga jie'tznu “Dios”, naani “¿xhicuent ditu nililajz xtiidxni?” <sup>32</sup> Diza niacti niājḡbreni “rebejḡ” sa'csi rdxejḡbreni rebenxhidaal, sa'csi guiraa rebejḡ huililajz Juan gujc te bejḡ ni guniipac xtidx Dios.

<sup>33</sup> Dxejcti guniireni, rājpreni loj Jesús:

—Dinu guidon.

Sas rājḡ Jesús lojreni:

—Dizana guiniä xhi yälrnibeere rapä runä redzuunre.

## 12

*Te xcuent rebenḡuijdx ni rbäzlaa*

*(Mt. 21:33-46; Lc. 20:9-19)*

<sup>1</sup> Dxejcti gusloj caguseed Jesús rebejḡ con recuent ni ruluii, rājḡpni:

—Yu' te bejḡ bazuj yaguub loj xyujni, bejnzani bazaani, dxejcru gudäänni te lajt cadre jiä't uubga. Dxejcti bejnni te yu' jiaa, te ro'c cue nani ga'p lo xyujni.

'Badedlaatinini loj gaii bejḡ, sä'tini zijt. <sup>2</sup> Che bidzujḡ xpäii uub, baxhaḷ baxhuaan uubga te

xmosni loj rebejn ni rbäzlaa ro'c, te xca'ni uub nani riäjĵ xca' bejnĵga. <sup>3</sup> Dxejc rebejn ni rbäzlaa ro'c gunaazreni mosga, gudijnreneni, luxh bazejcrenini siini ganaxni. <sup>4</sup> Dxejcru baxhalĵ baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rniajni gubi'ni. <sup>5</sup> Dxejc baxhalĵ bejnĵga stee mos, dxejc bagu'trenini. Baxhalĵni xhidajlrurenini. Gaii gudilguijdxreni, sgaiini bagu'treni.

<sup>6</sup> 'Yu'za tejtis xi'nni, luxh sanälajznini. Por lult näjza xi'nni baxhalĵni, naani: "Siucareni xi'nä." <sup>7</sup> Dxejc rebejn nani rbäzlaa ro'c räjp loj sa'reni: "Dee najc laa ni jiannäj ree. Colĵtaa, guigu'tnuni, te xca'nu yujre." <sup>8</sup> Sas gunaazrenini, bagu'trenini. Guläätirenini lo yujga.

<sup>9</sup> '¿Xhicha gun baxhuaan yaguubga rebejnre? Siädni luxh sugu'tni rebejnre, dxejcti gudeedni yujga loj ste'ca bejn.

<sup>10</sup> '¿La gajdtu golĵ guijtz ni rnii scree? Guij nani guläcaj renani runchee yu', ni'c agujc mastr ni guzuj galoo.

<sup>11</sup> Dad xtennu bejn scree, cos sacduxhni nezlojnu.

<sup>12</sup> Dxejc rĵajz reguxhtis nani bacuadiajg cuentre niniaaz Jesús, sa'csi gucbeereni laareni cacuaa Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

### *Düidx xcuent reimpuet*

*(Mt. 22:15-22; Lc. 20:20-26)*

<sup>13</sup> Dxejcti baxhalĵreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús. <sup>14</sup> Dxejcti biädreni, räjpreni lojni:

—Dad, nadonnu luj najclu te bejn ni rnili. Par luj guiraasi bejn sajc tebloj, sa'csi dilu fii la sajc bejn o la xhet sajc di bejn. Luj ruluiipaclu xhini'c rlajz Dios gun bejn. ¿La laaca quiix bejn reimpuest lo xcubieer César o la xhet laadi? ¿La guidiixnu o la dinu guidiix?

<sup>15</sup> Dxejcti laani gucbegajcni rujnsireni si'cni rni-abdiidxreni. Räjpnj lojnreni:

—¿Xhicuent runnäjtü narä scree? Coltanä te meelga loä, te fiä lojni.

<sup>16</sup> Badeedtireni te meel lojni, dxejc räjpni lojnreni:

—¿Chu yejc caj lojni, chu laj caj lojni?

Dxejc räjpreni:

—Xten César.

<sup>17</sup> Dxejc räjp Jesús lojnreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejnğa con xtiidxni.

*Yälrniabdiidx xcuent yälrbansacni lo rebenğut  
(Mt. 22:23-33; Lc. 20:27-40)*

<sup>18</sup> Sas biädhuii resaducee loj Jesús. Resaducee najc rebejn nani rnii di rebenğut guibansac. Dxejc gunabdiidxreni lojni, räjpreni:

<sup>19</sup> —Dad, xleii Moisés ruluii loonu, palga guet te niguii luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobejtzni. <sup>20</sup> Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni. <sup>21</sup> Dxejcti cua' ni rojpga gunaaga. Che gujtni, rut gajc di xi'nni. Si'cza gusajc ni ri-ojnğa. <sup>22</sup> Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtzza



gunaaga. <sup>23</sup> Guigajdzreni guläznäjreni gunaare. Cheni guibaṅsacreni lo rebēṅgut, ¿chu chääł gacni?

<sup>24</sup> Dxejc bazejc Jesús diidx lojreni, räjṗni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijtz, dizatu gumbēe yälṛnibee xten Dios. <sup>25</sup> Che guibaṅsacreni loj rebēṅgut, direni guchṅaa, rutza gudeedtireni te guchṅaareni. Niluxh sajcreni si'c najc rexangl Dios nani yu' xhaguibaa. <sup>26</sup> Palga canabdiidxtu la rbaṅsac rebēṅgut, ¿la di lajztu guisaj biłtu guijtz ni bacuaa Moisés? Moisés bacuaa nani gunii Dios lojni neṅ bajl, räjṗni: “Narä nacä Xtios Abraham, Xtios Isaac, Xtios Jacob.” <sup>27</sup> Palga Dios najc Xtios rebejṅre, direni gac bēṅgut, nabaṅnäjreni Dios. Et laadi najc xhigabtu.

*Yälṛnibee ni sajcru*  
(Mt. 22:34-40)

<sup>28</sup> Dxejcru bidzujṅ tej rebejṅ ni najn leii, biejn diajṅni xhi caniireni, biejnza diajṅni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcru lo guiraareni?

<sup>29</sup> Dxejc räjṗ Jesús lojni:

—Mandamient nani sajcru loj guiraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni. <sup>30</sup> Chanälajzlu Dad Xtioslu guideb lastoolu, nāj xaimlu, nāj guideb xcäriejṅlu, nājza guideb xcälṅnadiplajzlu.” <sup>31</sup> Sigajcza najc mandamient ni rojṗga: “Huinälajz sabejṅlu si'ctis sanälajzlu lagajc luj.” Redee najc remandamient nani sajcru loj guiraareni.

<sup>32</sup> Dxejcti räjṗ bejṅga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani. <sup>33</sup> Luxh sacduxh chanälajz bejn Dios guideb lastooni, näj xcäriejnni, näjza xaimni, näj guideb xcälñadiplajzni, luxh chanälajzni resabejnni sigajc laani. Redee sajcro loj ni rujn bejn che rudeedreni gojn lo Dios.

<sup>34</sup> Che bahuii Jesús laaca guniini, räjpni lojni:  
—Guxii cayäädx te jiu'lu loj xcälñabee Dios.  
Sas rutru biajxhdi gunabdiidx loj Jesús.

*Chu xi'n najc Crist*

*(Mt. 22:41-46; Lc. 20:41-44)*

<sup>35</sup> Che caguseed Jesús neñ guidoro, räjpni:

—¿Xho mood rnii rebejn ni najn leii Crist najc xi'n David? <sup>36</sup> Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

<sup>37</sup> Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebeñxhidaal nani yu' guejdxga bacuadi-agsa'creni xtiidxni.

*Gule'c Jesús xquej remastr xten leii*

*(Mt. 23:1-36; Lc. 11:37-54; 20:45-47)*

<sup>38</sup> Lañni caguseedni rebejn, räjpni lojreni:

—Col̄susin̄, na'c gu'chtu loj rebejn ni ruluii leii. Laareni rlajz sanäj reladsiool xtenreni. Rdxaglajzreni rnii bejn lojreni nez lo reguii.

<sup>39</sup> Rlajzaren̄i cuer̄eni cadro rbej renani sajcro neñ reguidoo näjza cadro ru' relanij.

<sup>40</sup> Rudzucajzaren̄i xhixten rebiuud, rniizaren̄i

xhidalduxh diidx che ro<sub>l</sub>reni le', te rusäuureni loj rebejn. Castigwroru gac redee.

*Gojn xten te biud prob*

*(Lc. 21:1-4)*

<sup>41</sup> Dxejcti gurej Jesús cuä' caj cadro rusäl bejn gojn. Cahuini cagusäl rebejn meel neñ cajga. Xhidajl reni rajp cagusäl xhidajl meel nenga. <sup>42</sup> Che biäd te biud prob, basälni tiop melbäz ni sajc si'cti tej centaab. <sup>43</sup> Dxejcru gurejdx Jesús rexpejn<sub>pacni</sub>, räjpni lojreni:

—Rniliäpac lojtu, biud proobre basäl xhidajlru lo guiraa renani basäl neñ cajre, <sup>44</sup> sa'csi guiraareni abasäl che'nsi xhixtenreni. Luxh gu-naare basäl guiraa nani rajpni. Ni'ctis najc nani gaunäjni.

## 13

*Gunii Jesús sibijl guidoo*

*(Mt. 24:1-2; Lc. 21:5-6)*

<sup>1</sup> Cheni sariireni neñ guidoro, räjp tej rexpejn<sub>pacni</sub> lojni:

—Dad, bahuii lacti reguij, lacti reyu'.

<sup>2</sup> Dxejcti räjp Jesús lojni:

—¿La rhuilu loj reyu're? Nicla tej guij dijia'n dzuub yejc sa'ni, guiraliireni sire'ch.

*Recos ni gac che ameer nitloj guedxliuj*

*(Mt. 24:3-28; Lc. 21:7-24; 17:22-24)*

<sup>3</sup> Dxejc sobga' Jesús yejc dajne' ni laa dan Oliib, cahuini nez ro' guidooga. Che sugaxhtebreni, gunabdiidx Pedr näj Jacobo näjza Juan näjza Andrés lojni, räjpreni:

4 —Gunii loonu, ¿guc gac dee? ¿Xhi guihuiinu te gacheenu asiáddzũngajxh soob guiraa rediidxre?

5 Dxejcti gusloj gunii Jesús lojreni, rájpnì:

—Colhiii, te rut gusgueedi la'tu, 6 sa'csi xhidalduxh bejn̄ jiäd con laä, gäbreni: “Narä nacä Crist”, luxh rniisireni si'c, susguezareni xhidajl bejn̄.

7 'Che jiejn diajgtu yu' guer̄ näj yäl̄nadxeb xten guer̄, na'c guidxejbtu. Nanabpac gacni; et dxejcdi nitloj guedxliuj. 8 Säjs naciõn̄ yejc sanacion̄ni, näj yäl̄rnibee yejc sayäl̄rnibeeni. Xhidajl lajt sajc xu, siliaanza bejn̄, luxh säjs rebejn̄ yejc sa'ni. Redee najc ni guisloj guidxejb, gachuinza lajzni.

9 'Dxejc la'tu col̄susin̄ sa'csi suteedreni la'tu ladzn̄aa reguxhtis, siguijnzareni la'tu nen̄ reguidoo. Sacrejdxtu lo regubieer näjza loj rereii xcäl̄nasa'c narä, te si'c gac guiniitu xtidxä lojreni.

10 Nanabpac guirechxgaa xtidx Dios loj guiraa reben̄ guedxliuj. 11 Che guiniaazreni la'tu, che chanäreni la'tu loj reguxhtis, na'c gunxgaatu xhigab xhi diidx guiniitu. Col̄nii nani jiäjtis yejcti dxejc, sa'csi xhet la'ditu ni guinii, Sprit Dxañ xten Dios ni guinii. 12 Luxh suto' bejn̄ lagajc bejtzni te guet bejtzni. Suto'za dad lagajc xi'nni. Säjs rebiuux yejc rexcusajnni te guet reguzajnga.

13 Sidxechlajz guiraa rebejn̄ lojtu sa'csi najctu xpenä; nani ted guiraa retrabajwre, ni'c gudeed Dios xcäl̄nabajnni.

14 'Che fiitu loj nani najc yäl̄rdxechlajz, nani najc yäl̄runitloj, nani gunii Daniel ni gunii xtidx Dios. Che fiitu nani suga' cadro di nunyäj̄l suuni, dxejcti suguxun̄ renani yu' nez Judea chääreni nez nen̄ redajn. (Nani gol̄ guijtzre sugacheenini.) 15 Bejn̄

nani suga' yejc yu' na'c jiajtni jiu'ni nen te yu' xca'ni gaa' xhixtenni. <sup>16</sup> Nani yu' loj niaa, di gal jiajt te xca'ni xhablajzni. <sup>17</sup> ;Aii! Xhiza nalas chu regunaa ni nuu baa, luxh renani rusia' xi'nni, nen redxejga. <sup>18</sup> Colnab loj Dios na'c sactu scree nen rebainajl. <sup>19</sup> Nen redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. <sup>20</sup> Paru di Dad gusia'tz redxejga, nicla tej bejn di laa. Susia'tzni redxejga sa'csi sanalajzni rexpejni nani aguleni.

<sup>21</sup> 'Dxejc palga yu' chu naa lojtu: "Colhuii, aree Crist", o "Colhuiire, ani suga' rec", na'c chalilajztuni. <sup>22</sup> Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajcn, rlanjreni gusgueelireni renani agule Dios. <sup>23</sup> Ni'cni la'tu colsusin; agunixgaä lojtu guira'ti ni gac.

*Xho gac che jiaad Xi'n Dios ni gujc Niguii  
(Mt. 24:29-35, 42-44; Lc. 21:25-36)*

<sup>24</sup> 'Nen redxejga, cheni luux retrabajwduxhga, sicäy lo gubijdx, luxh diru baai gusanij. <sup>25</sup> Sitejb rebalxhaguibaa, sinibsejs recos nani nasnaj rebalxhaguibaa. <sup>26</sup> Dxejcti suhuii rebejn loä, Xi'n Dios nani gujc Niguii, siälä nen reza guideb yalrnibeduxh xtenä, najza xcaldimbicha'ä. <sup>27</sup> Dxejcti guxhalgacä rexanglä jiadtojpreni renani guleä guideb lo guedxliuj, cat nalooli guedxliuj najza cadre nalooli guibaa.

<sup>28</sup> 'Colguiseed nani ruluii yagiigw. Cheni rii rebäte' lojni luxh che rcaj balajg lojni, acaxhna-jntu baai gusguj asadzungajxh. <sup>29</sup> Sigajcza, che fiitu acayajc recosre, sacheetu asiädgaxhä, ameer

guidzunä. <sup>30</sup> Rniliäpac lojtu, rebejn ni nabajn dx-  
ejc, direni nitloj, fixgaareni gac recosga. <sup>31</sup> Sinitloj  
guibaa näjza guedxliuj, rextidxä di nitloj.

<sup>32</sup> Naj, rut najndi gac gac recosga, nicla rexangl  
Dios ni yu' xhaguibaa, niclaza narä Xi'n Dios,  
Xtadätis najn.

<sup>33</sup> Colhuii, col̄susin, col̄nab loj Dios, sa'csi ditu  
gan gac guidzujn redxejga. <sup>34</sup> Dee najc si'c najc te  
bejn ni birii sää zijt. Che gajdlini guirii, badeedni  
xtzun rexmosni, luxh gunibeezani susin nani  
canäj rolä'. <sup>35</sup> Si'cza col̄susin, sa'csi ditu gan gac  
jiääd baxhuaan yu'ga, la jiäädni gudxej, o la jiäädni  
garol yääl, o la cäy, o la jiäädni rsil. <sup>36</sup> Col̄susin, te  
di guiga'tu nagayejstu che guidzujni. <sup>37</sup> Rediidx  
nani rniä lojtu, loj guiraa rebejn rniäni: col̄susin.

## 14

### *Ruchaagreni diidx te guiniaazreni Jesús*

*(Mt. 26:1-5; Lc. 22:1-2; Jn. 11:45-53)*

<sup>1</sup> Riäädx tiop dxej guidzujn lanij, dxej ni ruzaa  
lajzreni gulaareni ladznaa reEgipto. Nen redxe-  
jga rajwreni yätxtiil nani di saguij. Rebixhojz  
nani rnibee neñ guidoo xten rexpejn Israel näj  
rebejn ni ruluii leii rlajzreni niniaazreni Jesús con  
yälrusguee, te nugu'trenini. <sup>2</sup> Dxejcti räjpreni lo  
sa'reni:

—Na'c jiennu scree neñ redxelanij, te na'c gun  
beñguejdx biey.

### *Te gunaa ni basäl se't yejc Jesús Betania*

*(Mt. 26:6-13; Jn. 12:1-8)*

<sup>3</sup> Yu' Jesús Betania, rolijz Simón, nani guyu'  
guejch ni ral tiejxhni. Che sobga'ni lo mex,

biääd te gunaa ca' te bo'tguij yu' setnard nenni. Rlianexhduxhni, sacduxhni. Dxejc gudi'chni yejn bo'tguijga, te basälni se'tga yejc Jesús. <sup>4</sup> Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga? <sup>5</sup> Paru nido' se'tga, nijni si'cti chon gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

<sup>6</sup> Dxejc räjp Jesús lojreni:

—Colsaanni, ¿xhicuent rudxojuantu nani cayujn gunaare? Cos sacduxh dee bennäjni narä. <sup>7</sup> Guideb ni guibajntu, su' rebejn nani xhet rajpdi lojtu, luxh che rlanjtu sajc gacnäjtireni. Narä et xchejdi chu'ä lojtu. <sup>8</sup> Gunaare abejnni nani gujctis bejni. Abaslanexhxgaani tiexhä, te chää tiexhä nen baa. <sup>9</sup> Rniliäpac lojtu, cadrotis guidzujn xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

*Rlajz Judas guto' Jesús*

*(Mt. 26:14-16; Lc. 22:3-6)*

<sup>10</sup> Dxejcti huij Judas Iscariot, nani najc tej retzubitio'p xpejn pac Jesús, loj rebixhojz nani rnibee te guto'ni Jesús lojreni. <sup>11</sup> Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguuil Judas xho guto'ni Jesús.

*Gudauxchej Dad con rexpejn pacni*

*(Mt. 26:17-29; Lc. 22:7-23; Jn. 13:21-30; 1Co. 11:23-26)*

<sup>12</sup> Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladznaa reEgipto. Räjp rexpejn pacni loj Jesús:

—¿Caro rɫajzlu chosucheenu te gauulu nadxej, dxelanij?

<sup>13</sup> Dxejc baxhalni tiop rexpejn̄pacni, räjpni lojreni:

—Colchäj neñ guejdx, ro'c guidxaagtu te niguii ni nuu te re' nis. Colchanajl niguiiga. <sup>14</sup> Cadro jiu'ni colye'tz loj bejn̄ ni najc rolijzni ro'c: “Naj Dad mastr, ¿con yu' cadro ria'n rebiooz, cadro gaunäjni rexpejn̄pacni nadxej, dxelanij?” <sup>15</sup> Dxejcti guluiini lojtu te yu' ni sojb jiaaliga yejc sa'ni, ni asuchexgaa nenni. Colyujn xhi guidaunu ro'c.

<sup>16</sup> Sas huij rexpejn̄pacni, bidzujn̄reni neñ guejdxga. Bidxälreni te yu' si'cni räjp Jesús lojreni. Ro'c bejn̄reni xhi gudajwreni dxelanij.

<sup>17</sup> Che huääz gubijdx, bidzunnäj Jesús guitzubitio'p xpejn̄pacni. <sup>18</sup> Lalni sobga'reni lo mex caya-jwreni, räjp Jesús lojreni:

—Rniliäpac lojtu, tej la'tu ni cayaunää, suto'ni narä.

<sup>19</sup> Dxejcti gusloj cayac-huin lajzreni, räjp tebgajreni lo Jesús:

—¿La naräni?

Räpgajc steeni:

—¿La naräni?

<sup>20</sup> Dxejcti guniini, räjpni lojreni:

—La tej retzubitio'p, tej ni cayajw loj xpla'tä.

<sup>21</sup> Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

<sup>22</sup> Lalni cayajwreni, cua' Jesús yätxtiil, badeedzani xquixhtiooz loj Dios dxejc gula'nini, badeednini lojreni. Dxejcti räjpni:

—Colca' yätxtiilre. Dee najc si'c tiexhä.



<sup>23</sup> Cuagajcni te bas. Che abadeedni xquixhtiooz loj Dios, badeednini lojreni, gu' guiraareni nen basga. <sup>24</sup> Dxejcti räjp Jesús lojreni:

—Dee najc si'c xtienä ni ruluu diidx ni biä'nnu, nani guixe' xcuent xhidajl rebejn. <sup>25</sup> Rniliäpac lojtu, diruna yä'ä bin nani ri'ie yejc uub, dxejli yä'äni stehuält loj xcälrnibee Dios.

*Gunii Jesús sinii Pedr dini gumbeeni*

(Mt. 26:30-35; Lc. 22:31-34; Jn. 13:36-38)

<sup>26</sup> Che gulujx bilreni te dij xten Dios, biriireni, sääreni nez dajne' ni laa dan Olib. <sup>27</sup> Dxejcru räjp Jesús lojreni:

—Guiraatu sibälaztu narä naguxhijn, sa'csi si'c cajni lo guijt: “Sugu'tä baxhtoor luxh suxun rexiiil.” <sup>28</sup> Che guibansacä loj rebengut, ganidä cha'a Galilee, dxejcti jiäädte.

<sup>29</sup> Dxejc räjp Pedr loj Jesús:

—Palga guiraareni cuälazlu, narä dina cuälazälu.

<sup>30</sup> Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgäi cuedxa' tiop huält, luj aguiniilu chon huält dilu gumbee narä.

<sup>31</sup> Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejn pacni gunii si'c.

*Gunab Jesús loj Dios che yu'ni Getsemani*

(Mt. 26:36-46; Lc. 22:39-46)

<sup>32</sup> Dxejcti bidzujnreni te lajt cadro laa Getsemani. Dxejc räjpni loj rexpejn pacni:

—Colcuej ree lalni chanabä lo Dios.

<sup>33</sup> Dxejcru sanäni Pedr näj Jacoob näjza Juan. Dxejc gusloj cayac-huinduxh lajzni, luxh cayu'ni yälrsiaduxh. <sup>34</sup> Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

<sup>35</sup> Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc. <sup>36</sup> Räjpni:

—Abba, xtaä, luj rajc rujnlu guira'ti: badzucaj retrabajwre loä. Xhet si'cni rlazädi narä, bejn si'cni rlanjlu luj.

<sup>37</sup> Dxejc biäädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' dini-ajcdi nutie'chlu bacal? <sup>38</sup> Coltie'ch bacal, colnab lo Dios, te na'c guntu dojl. Lastootu rlanj gutie'chtu bacal, luxh tiejxhtu abadxajg.

<sup>39</sup> Huij Jesús stehuält, binabni loj Dios, guniini lagajc rediidx ni guniini galoo. <sup>40</sup> Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. <sup>41</sup> Ni riojn huält biäädni, dxejc räjpni lojreni:

—Agojl colguejs, colsilajz, agujc, abidzujn or ni ted Xi'n Dios ni gujc Niguui ladznaa rebendojl. <sup>42</sup> Colchastie, colcho'. Asiäddzungajxh ni guto' narä.

### *Gunaazreni Jesús*

*(Mt. 26:47-56; Lc. 22:47-53; Jn. 18:2-11)*

<sup>43</sup> Canisijcni scree, che bidzujn Judas, ni najc te retzubitio'p xpejnpacni, siädnäni xhidajl bejn. Ca'reni spaad, ca'reni yajg biriireni lo rebixhojz

nani rnibee, nájza rebejn ni ruluii leii, nájza rebeḅgool nani najc guxhtis. <sup>44</sup> Niluxh nani ruto' Jesús abadeedni te seen lojreni, rájpní:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

<sup>45</sup> Che bidzujñ Judas, gubigni loj Jesús, rájpní lojni:

—Dad, Dad.

Sas bachagro'nini. <sup>46</sup> Dxejcru gunaazreni Jesús ro'c.

<sup>47</sup> Dxejc tej reni suga' ro'c, gulää xspaadni, gudilguijdxni xmos bixhojz nani sajcrú, batiu'ni diajgni. <sup>48</sup> Dxejc rájpní Jesús loj rebejn:

—¿La siädxhiitu narä con spaad nájza garo't si'c rixiitu te gubaan? <sup>49</sup> Guiraa dxej guyu'ä lojtu neñ guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

<sup>50</sup> Dxejcru rexpejn pacni gulälazrenini, baxuñtireni.

### *Bi'n nani baxuñ*

<sup>51</sup> Sanajlza te bi'n Jesús, nadejbni ganaxhtis te bariaad. Si'c gunaazrenini. <sup>52</sup> Dxejcti baxuñni, libasa'nni bariaadga, sä'tini xhabäälni.

### *Suga' Jesús loj reguxhtis*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Dxejc biädnäreni Jesús loj bixhojz ni sajcrú. Bidojpní rebixhojz nani rnibee, náj rebēgool ni najc guxhtis, nájza rebejn ni ruluii leii. <sup>54</sup> Luxh Pedr zijt zijt sanajlní Jesús. Che bidzujñtini lo xle' bixhojz

ni saj cru, gurenäjni rebejn nani rajp ro'c, cagucha' lajz ni lo bajl.

<sup>55</sup> Rebixhojz nani rnibee, näjza guiraa rebengool ni najc guxhtis, caguilreni xhi tej xquej Jesús nidxälreni, te nugu'treni Jesús, xhet bidxäldireni.

<sup>56</sup> Xhidajl bejn gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni. <sup>57</sup> Dxejc huisulii gaii bejn ni guniireni stee didxxhii xcuent Jesús, räjpreni:

<sup>58</sup> —Nuunu biejn diaagnu guniini: “Sutiexhä xyu' Dios ni guc-chee con ñaa rebejn, luxh choñtis dxej guncheä steeni, ni nac-chee et con ñaadi rebejn.”

<sup>59</sup> Nicla si'c di xtiidxreni nile', sa'csi garen garenza guniireni.

<sup>60</sup> Dxejcti huisulii bixhojz ni saj cru galäi guiraa rebejn, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

<sup>61</sup> Laani niä uutis ro'ni, xhet guniidini. Dxejcti gunabdidxsac bixhojz ni saj cru lojni, räjpni:

—¿La luj ni najc Crist, xi'n Dios nani rliä'p bejn xpala'nni, ä?

<sup>62</sup> Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguii, sobga'ä xladbee Dios ni rnibee, siäläza nen reza ni tre' xhaguibaa.

<sup>63</sup> Dxej cru bixhojz ni saj cruga, batiäjsni tla' xhajibni, räjpni:

—¿Xhi jienrunu guidiilnu diidx xcuentni?

<sup>64</sup> Abiejn diajgtu xho guniyajni Dios. Ñaja', ¿xhi najtu?

Dxejcti guiraareni räjp nungäjlpac guetni.

<sup>65</sup> Dxejc yu' reni gusloj cagutiobxhejn lojni, luxh basäuureni lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

*Gunii Pedr dini gumbee Jesús*

*(Mt. 26:69-75; Lc. 22:56-62; Jn. 18:15-18, 25-29)*

<sup>66</sup> Dxejc suga' Pedr lo yuj, nez lo le'ga, che biääd te xcriaad bixhojz ni sajcrü. <sup>67</sup> Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siääd Nazare't.

<sup>68</sup> Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgäi. <sup>69</sup> Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

<sup>70</sup> Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi ben Galileelu, luxh guyasi riejn rniilu si'c rnii reben Galilee.

<sup>71</sup> Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

<sup>72</sup> Dxejcti barojp huält guredxa' guidgäi. Dxejc banalajz Pedr nani räjp Jesús lojni: “Che gajdli guidgäi cuedxa' tiop huält, luj gacla choñ huält aräjplu dilu gumbee narä.”

Dxejc guslojni cayoonni.

# 15

## *Suga' Jesús loj Pila't*

*(Mt. 27:1-2, 11-14; Lc. 23:1-5; Jn. 18:28-38)*

<sup>1</sup> Che bara yääl bidxaag sa' rebixhojz ni rnibee, näj rebeᅅgool ni najc guxhtis, näjza rebejᅅn ni ru-luii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. <sup>2</sup> Dxejc gunabdiidx Pila't loj Jesús räjpni:

—¿La luj ni najc reii xten rexpejᅅn Israel, ä?

Räjp Jesús lojni:

—Si'cni guniilu, si'c najcni.

<sup>3</sup> Dxejc gusloj rebixhojz nani rnibee cabe'c rexquej Jesús. <sup>4</sup> Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

<sup>5</sup> Bidxeloj Pila't sa'csi nicla si'c xhetru guniidi Jesús.

## *Gunibeereni guet Jesús*

*(Mt. 27:15-31; Lc. 23:13-25; Jn. 18:38–19:16)*

<sup>6</sup> Dxelanijpac ruslaa Pila't tej rebejᅅn ni yu' latzguiib. Ruslaani chutis te ni rniab rebejᅅn. <sup>7</sup> Lo rebejᅅn ni yu' latzguiib nadxaag te niguii ni laa Barrabás. Bagu'tni te bejᅅn che nu'chni lo te cuaa bejᅅn ni gudilnäj gubieer. <sup>8</sup> Dxejc bidojp xhidajl bejᅅn loj Pila't, gunabreni lojni gunni si'ttis ru-jnni casob lanij. <sup>9</sup> Dxejc gunabdiidx Pila't lojreni, räjpni:

—¿La rlanjtu guslaä reii xten rexpejᅅn Israel, ä?

<sup>10</sup> Sa'csi gucbegajcni rdxechlajz rebixhojz loj Jesús, ni'c bateedrenini lojni. <sup>11</sup> Ni'cni baquiilza rebixhojz ni rnibee rebeᅅxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

<sup>12</sup> Dxejc räjp Pila't lojreni stehuält:

—¿Xhini'c rlanjtu gunnäã nani rniitu reii xten rexpejn Israel?

<sup>13</sup> Dxejcru guredxa'reni:

—¡Bacuaani lo cruzj!

<sup>14</sup> Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo cruzj!

<sup>15</sup> Baslaati Pila't Barrabás, sa'csi rlanjz ni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruzj.

<sup>16</sup> Dxejc huinä rexsoldaadni Jesús neñ Pre-toor, yu' cadro rujnreni yälguxhtis, ro'c batojpreni guiraa resa'reni. <sup>17</sup> Dxejcti bashuajcwreni Jesús te lad moraad, bencheereni te coron guejch basälreni yejcní. <sup>18</sup> Guslogajc caguxhi näjrenini, caniireni lojni:

—¡Colguiliä'p xpala'n reii xten rexpejn Israel!

<sup>19</sup> Batiäjlni te yabixhijl yejcní, batiobxhejnreni lojni, luxh guzuxhijbreni te rajnrenini. <sup>20</sup> Che gulujx basacsíreni Jesús, gulääreni lad moraad ni najcwni, sas bashuajcwrenini xhajbpacni. Gulägajczeni Jesús te cuaarenini lo cruzj.

*Bacuaareni Jesús loj cruzj*

*(Mt. 27:32-44; Lc. 23:26-43; Jn. 19:17-27)*

<sup>21</sup> Te niguii ni laa Simón, ni siääd Cirene, sadejd ro'c, bazajni lo nejz. Niguiire najc xtad Alejandro näjza Rufo. Che sadejdni nejzga, la fuerz basgu-urenini xcruzj Jesús.

<sup>22</sup> Dxejcti huinäreni Jesús cadro laa Gólgota, nani säloj: dan Calabeer. <sup>23</sup> Ro'c badeedreni lo Jesús bin nani nu'ch mir lojni, dxejc laani naaddini niä'ni binga. <sup>24</sup> Che gulujxti bacuaareni Jesús loj cruzj, gudzujtreni yejc rexbajbni, te don xhini'c xca' tejpgareni.

<sup>25</sup> Agujc choṇ or gulejn gubijdx che bacuaareni Jesús lo cruzj. <sup>26</sup> Letreer cadro bacuaareni xtojṇni scree bejnrenini: “Reii xten rexpejn Israel.” <sup>27</sup> Bacuaazareni lo stiop cruzj tiop gubaan, tejni xladbee Jesús, xtee xladbäjgwni. <sup>28</sup> Dxejc guzobj diidx ni caj loj guiitz nani rnii: “Loj rebenguijdx bigabni.”

<sup>29</sup> Luxh renani sadejd nejzga guniyajreni Jesús, cagusniibreni yejcreni, räjpreni lojni:

—¡Jaa! Luj nutiejxhlu guidoo luxh choṇtis dxej niunchesacluni. <sup>30</sup> Naj baslaa lagajc luj, biäjt loj cruzjga.

<sup>31</sup> Näjza rebixhojz ni rnibee, näj rebejn ni ruluii leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani. <sup>32</sup> Naj sujiäjt Cristre, reii xten rexpejn Israel, lo cruzj te guihuünu, te chalilaaznu.

Näj regubaan ni caj lo cruzj guniyajzareni Jesús.

### *Xcälgujt Jesús*

(Mt. 27:45-56; Lc. 23:44-49; Jn. 19:28-30)

<sup>33</sup> Che gojṇ läidxej, bicäy si'cti choṇ or. <sup>34</sup> Che gudejd choṇ orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?



<sup>35</sup> Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

<sup>36</sup> Sas baxun tejni, bahuajdxni te sponj loj binagr. Dxej cru basälhini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruju.

<sup>37</sup> Dxej cru guredxaduxh Jesús, gujttini. <sup>38</sup> Dxejc lajd ni najl neñ guidoro biräjsni, gujcn tiop la', jiaali lo yujli. <sup>39</sup> Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

<sup>40</sup> Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. <sup>41</sup> Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädnejl Jesús che biädni Jerusalén.

### *Biga'tz Jesús*

*(Mt. 27:57-61; Lc. 23:50-56; Jn. 19:38-42)*

<sup>42</sup> Biu' gudxhijñ, luxh najcni dxe bispr che rusucheereni par sabd, dxej ni rusilajz rexpejn Israel. <sup>43</sup> Biäd José ni siäd Arimatea, najcni te rebejn ni saj loj reguxhtis. Näjza laani cabäjzni xcälrnibee Dios. Guideb yäl nabajñ gunabni tiexh Jesús lo Pila't. <sup>44</sup> Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. <sup>45</sup> Che räjp capitánga lojni agujt Jesús, dxejc badeed Pila't tiexh Jesús loj José. <sup>46</sup> Agusii José te bariaad,

luxh che gulätni Jesús lo cruzj, batejbnini nen bariaadga. Dxejc gudixhni Jesús nen te biliää ni caj cuä' te guilaj, dxejcru batzugni te guiro ro' biliääga. <sup>47</sup> Bahuii Marii Magdalen näj Marii xnan José cadro biga'tz Jesús.

## 16

### *Huäjz Jesús loj rebengut*

*(Mt. 28:1-10; Lc. 24:1-12; Jn. 20:1-10)*

<sup>1</sup> Che gudejd sabd, dxej ni rusilajz rexpejn Israael, Marii Magdalen näj Marii xnan Jacoob näjza Salomee gusii setnejxh te chatääbreni se'tga tiexh Jesús. <sup>2</sup> Che biu' xmaan, rsildooru, che calejn gubijdx, biäädreni ro' xpaani. <sup>3</sup> Cayäjp loj sa'reni:

—¿Chu gudzucaj guiroga ro' xpaani te jiu'nu?

<sup>4</sup> Che gudixhlojreni, bahuiireni alagubicaj guijga, luxh najcni te guiroduxh. <sup>5</sup> Che biu'reni nen biliääga, bahuiireni lo te bi'n sobga' ladbee nen biliääga. Najcw bi'nga te ladnol ni najc siool. Dxejc bidxejb regunaaga. <sup>6</sup> Dxejcti räjp bi'nga lojreni:

—Na'c guidxejbtu. Caguiiltu Jesús ni siääd Nazare't, nani cuaj lo cruzj. Rutiruni ree. Agubajñni lo rebengut, coltahuii cadro gudixhreni tiejxhni. <sup>7</sup> Colchäj, colchaye'tz lo rexpejñpacni, loj Pedr, ganidla Jesús guidzujñ Galilee, dxejcti guidzujñtu. Ro'c fiitu lojni, si'cni guniini lojtu.

<sup>8</sup> Biriitireni ro' biliääga, racejslireni sa'csi cadxejbreni. Rut lojdi guniidireni sa'csi cadebduxhreni.

### *Baluiloj Jesús loj Marii Magdalen*

*(Jn. 20:11-18)*

<sup>9</sup> Gubajñ Jesús loj rebeṅgut rsildooru che biu' xmaan. Baluilojni galoo loj Marii Magdalen, nani agacgulääni gajdz beṅdxab neṅ lastooni. <sup>10</sup> Dxejcti huij Marii Magdalen, huiye'tzni loj renani cuansañ Jesús, renani cayac-huin lajzni, cayoonreni. <sup>11</sup> Che biejn diajgreni ahuäzsac Jesús lo rebeṅgut, luxh Marii abahuii lojni, di lajzreni nilii.

*Baluiloj Jesús loj tiop xpejn pacni*  
(Lc. 24:13-35)

<sup>12</sup> Ste'ca najc Jesús baluilojni loj tio'p renani sasaj sääreni lo nejz. <sup>13</sup> Dxejcti gubi'reni, huiye'tzreni loj sgaiga, luxh nicla xtidx reni'c di lajzreni nilii.

*Baxhal Jesús repost*  
(Mt. 28:16-20; Lc. 24:36-49; Jn. 20:19-23)

<sup>14</sup> Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubangajcni loj rebeṅgut. <sup>15</sup> Räj p Jesús lojreni:

—Colchäj guideb lo guedxliuj, colnii xtidx Dios lo guiraa rebejn. <sup>16</sup> Nani chalilajz luxh tiobnisni, siliaani loj dojl; biäda nani di lajzni chalii sinijtni lo dojl. <sup>17</sup> Niluxh remilagwre jiannäj renani chalilajz: sibääreni beṅdxab xcuentä; siniireni ste'ca diidx; <sup>18</sup> guiniaazreni bäl con naareni; masque yäreni xhicos ni rugu't bejn, xhet gacdi'reni; susujreni naareni yejc rebenracxhuu luxh siajc rebenracxhuu.

*Huä'p Jesús xhaguibaa*  
(Lc. 24:50-53)

<sup>19</sup> Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. <sup>20</sup> Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnni milagwr te gucbee bejn laapac xtidx Dios ni caniireni. Sugacni si'c.

**Xtidxcoob Dios ni biädnä dad Jesucrist  
New Testament in Zapotec, Mitla (MX:zaw:Zapotec,  
Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

**Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

5cff1274-8dc3-5398-a94d-f6033bb363c9